

摘藻堂四庫全書薈要

集部

欽定四庫全書薈要

集部

白氏長慶集卷

四十八至
五十

詳校官助教臣常循



欽定四庫全書薈要卷一萬三千九百七十八

集部

白氏長慶集卷四十八

唐白居易撰

中書制誥一

舊體○凡二十七道

張徹宋申錫可並監察御史制

敕舊制副丞相缺中執憲得出入御史缺則於內外史
中考覈其實封奏其名以補之今御史中丞僧孺奏某
官張徹某官宋申錫皆方直彊毅可監察御史章下丞



相府丞相亦曰可朕其從之並可監察御史

楊子留後殷彪授金州刺史兼侍御史河陰令
韋同憲授南鄭令韋弁授絳州長史三人同
制

敕某官殷彪等今之郡守古侯伯也今之邑令古子男
也於更有君臣之道焉於人有父母之道焉郡邑之間
承上率下者州長史也凡此之官與吾共理使吾人安
而無怨者其在吏良而政平乎金秦之郡也奏告專達

得行異政以彪清平信惠臨事能守大小之職率著名
績故仍憲簡俾往牧之南鄭梁之邑也上有賢師無憂
掣肘以同憲河陰有政可以移用故換銅印俾往宰之
而絳為名藩并實良士命之贊貳亦叶其宜宜各悉心
修舉三職可依前件

馮宿除兵部郎中知制誥制

敕吾聞武德暨開元中有顏師古陳叔達蘇頲稱大手
筆掌書王命故一朝言語煥成文章朕承祖宗思濟其

美凡選一才補一職皆不敢輕易其庶幾前事乎刑部
郎中馮宿為文甚正立意甚明筆力雄健不浮不鄙况
立身守事端方精敏而我誥命忽思潤色之聽諸人言
曰宿也可宿立朝歷御史博士郡守尚書郎在仕進途
不為不遇然不登茲選未足其心故吾於今歸汝職業
仍遷秩為五兵郎中勉繼顏陳無辱吾舉可尚書兵部
郎中知制誥

鄭覃可給事中制

敕給事中之職凡制敕有不便於時者得封奏之刑獄
有未合於理者得駁正之天下寃滯無告者得與御史
糾理之有司選補不當者得與侍中裁退之率是而行
號為稱職固不專於掌侍奉讚詔令而已中大夫行諫
議大夫雲騎尉滎陽縣開國男食邑三百戶鄭覃清節
直行正色寡言先臣之風藹然猶在自居首諫益勵寒
鶚擢領是職必有可觀亦欲天下聞之知吾獎骨鯁之
臣來諫諍之道也可給事中散官勲如故

韋審規可西川節度副使御史中丞李虞仲崔
戎姚向溫會等並西川判官皆賜緋各檢校
省官兼御史制

敕西川曰益部地有險府有兵礙戎屏華號為難理故
吾命文昌為帥長俾鎮撫焉次命審規為上介俾左右
焉又命虞仲戎向會等為庶僚俾咨度焉進言者謂文
昌賢而審規輩才以才佐賢蜀必理矣輟三署吏贊丞
相府假憲官職加臺郎暨一命再命之服以遣之其於

張大光榮與四方征鎮之賓寮不侔矣爾等苟佐吾丞相以善政聞使吾無一方之憂吾寧久遺汝於諸侯乎爾其勉之可依前件

魏博軍將呂晃等從弘正到鎮州各加御史大夫賓客等制

勅去年冬命侍中弘正建大將軍旗鼓移鎮於成德軍而晃以下四十有一人實從魏來或驅或殿被堅執銳可謂有勞宜以官坊之寮憲府之職隨其名秩序而寵

之可依前件

張平叔可戶部侍郎判度支制

時長慶二年三月制

勅故事君使臣其道不一或先勞而後受賞或先加寵而後責功蓋宜便有後先時事有緩急故耳朝議大夫守鴻臚卿兼御史大夫判度支上柱國賜紫金魚袋張平叔國之材臣也計能析秋毫吏畏如夏日司會逾月綱條甚張况師旅未息調食方急倚成取濟非爾而誰故自大鴻臚換居人部造膝而授不時而遷其要無他

是欲急吾事而望倚爾功也公卿以降羣有司盈庭然
問曰與吾坐而決事丞相以下不過四五而主計之臣
在焉非智能則事不可成非諒直則吾難近噫職局之
外得不思稱官望而厭我心乎可守尚書戶部侍郎判
度支散官勲賜如故

李虞仲可兵部員外郎崔戎可戶部員外郎制
敕劔南西川節度判官朝散大夫檢校尚書戶部郎中
兼侍御史上柱國賜紫金魚袋李虞仲西川觀察判官

朝議郎檢校刑部員外郎兼侍御史雲騎尉賜緋魚袋
崔戎等去年春朕憂西南事授丞相文昌鉞鎮撫之次
選郎吏有才實如虞仲輩者往贊理之故其制云苟佐
吾丞相以善政聞寧久遺汝於諸侯乎今蜀政成矣蜀
人安矣是汝輩職修事舉而奉吾詔書甚謹也前言在
耳安可弭忘並命為郎主吾信賞虞仲可行尚書兵部
員外郎戎可尚書戶部員外郎散官勲如故

牛僧孺可戶部侍郎制

敕戶部侍郎周之地官小司徒也掌天下田戶之圖生
齒之籍賦役貨幣之政令以待國用而質歲成元和以
還日益寵重善其職者多登大任中茲選者莫匪正人
誰其稱之我有邦彥朝議郎守御史中丞上柱國賜紫
金魚袋牛僧孺自舉賢良踐臺閣秉潤色筆提糾繆綱
而書命無繁詞決事無留獄受寵有憂色納忠多苦言
朕心知之何用不可夫以人會之重如彼僧孺之賢若
此俾居是職不亦宜乎可守尚書戶部侍郎散官勲如

故

庾承宣可尚書右丞制

敕朝議大夫守尚書刑部侍郎驍騎尉庾承宣昔我太宗文皇帝嘗謂尚書丞百職綱維事一失中則天下有受其弊者因命戴胄魏徵及杜正倫劉洎輩繼領是職分居左右官修事理人到于今稱之故吾前命崔戎持左綱今命承宣操右轄衆口藉藉頗為得人況承宣端諒勤敏周知典故必能為我紐有條之綱杞妄動之輪

坐曹得出入郎官立朝得奏彈御史會政決要扶樹理
本無俾戴魏劉杜專美於貞觀中可守尚書右丞散官
勲如故

張聿可衢州刺史制

敕中散大夫行尚書工部員外郎上柱國吳縣開國男
食邑三百戶張聿內外庶官同歸共理牧守之任最親
吾人蓋施張舉措由其心賞罰威福懸其手若一日失
其職一郡非其人而名未達于朝聽之間為害已甚矣

選授之際得不慎夫以爾聿前領建溪有理行次臨沔
郡著能名用爾所長副吾所急宜輟郎署往頒詔條來
暮之聲佇入吾耳可使持節衢州刺史散官勲如故

辛丘度可工部員外郎李石可左補闕李仍叔
可右補闕三人同制

敕朝散大夫右補闕內供奉飛騎尉辛丘度等朕詔丞
相求方畧忠謹之士置于左右而播等以石暨仍叔應
詔言其為人厚實審直嘗以文行謀畫容於幕府之間

臨事敢言當官能守可使束帶同升諸朝又言丘度介
潔靜專不交勢利宜加推獎以勸其徒况久次者轉遷
後來者登進皆適所用平章可之可依前件

魏博軍將薛之縱等十四人各授官爵制

敕薛之縱等去年冬授愬鉞俾自徐鎮潞而愬與其麾
下同德食不求飽席不暇暖節鎮殿定一如所委此誠
愬之忠略然所賴之縱等焦心戮力同濟厥功而頒賞
已逾時秩宜加等我有爵祿分而命之知吾不遺細大

之功可依前件

裴度李夷簡王播鄭絪楊於陵等各賜爵并廻授爵制

敕禮云臣下竭力盡忠以立功於國者必報之以爵祿此言上之不虚取于下也而司空度等咸以心力作股肱心膂之臣大節大勞書在甲令然則功如是忠如是高爵重秩予何愛焉故能統御之初先行信賞詔主爵者合為奏書或加寵進封或延恩任子次勤第品咸按

舊章行乎敬之無忝予一人之嘉命可依前件

鄭餘慶楊同懸等十人亡母追贈郡國夫人制
勅餘慶亡母某氏等夫德不旌則勸善之典缺矣親不
顯則揚名之道廢矣凡今公卿大夫至於元士濟濟然
抱忠履信立我朝者皆聖善之教燕翼之方所致也自
家刑國有所從來不大封崇是忘報施朕去年仲月統
御之初發號推恩先降是命宣直光前慰後而已哉亦
欲使天下為母者聞庶幾乎善統其家慈訓其子厚人

倫而美教化也可不務乎

李寘授咸陽令制

勅某官李寘近者西夷犯塞詔諸將出師司計臣俊言
寘有應辨才可司饋餉故自京府掾假臺郎憲職以命
之屬寇遁師旋未展其用况在公族推有器幹今授銅
印俾宰咸陽夫庶官之任為急西郊咫尺佇爾能聲可
京兆府咸陽縣令

劉縱授祕書郎制

勅某官劉縱徒步詣闕上獻封章又自叙其先臣陳許
閒事皆歷歷可聽公侯子弟多溺於驕邪爾能讀書學
文自可嘉獎圖籍之府命爾為郎豈唯振滯求能且不
欲使勲勞之後棲棲於塵土中可祕書省祕書郎

程羣授坊州司馬制

勅程羣嘗從事於鎮冀之間病免所職垂老之歲棄為
窮人張張無歸有足傷者夫一夫不獲若納諸隍此聖
王用心推己及物今宜與羣祿食使飽暖其身亦猶晉

君不能忘情於絳老也往佐中部爾其念哉可坊州司馬

海州刺史王元輔加中丞制

勅海州刺史王元輔漢制二千石有政績者就中加命秩不即改移蓋欲使吏久於官而人安於化也今元輔為郡頗有理名庶使上聞奏課居最宜加中憲旌而寵焉庶使與君共理者聞而知勸可兼御史中丞

楊潛可洋州刺史李繁可遂州刺史史備可濠

州刺史制

敕朝散大夫守尚書金部郎中上柱國楊潛溫厚靜專
有端士之操朝議大夫前使持節吉州諸軍事吉州刺
史上柱國李繁精彊博敏有才子之稱將仕郎前使持
節光州諸軍事守光州刺史雲騎尉史備變通健決有
良吏之用而能本於文學輔以政事為郎見其行為郡
聞其聲夫洋更梁之險遂居蜀之腴濠控淮之要三者
皆名郡而委之三吏得不思勤儉教導勞來安輯膏雨

吾土襦袴吾人者乎潛可使持節洋州諸軍事守洋州
刺史散官勲如故繁可使持節都督遂州諸軍事守遂
州刺史備可使持節濠州諸軍事守濠州刺史充團練
渦口西城等使官勲如故

張洪相里友畧並山南東道判官同制

敕朝議郎守太常博士上柱國張洪前瀛漢等州都團
練判官朝議郎侍御史內供奉上柱國賜緋魚袋相里
友畧等元翼以大節大忠綽聞朝野授鉞開府殿我漢

南而又求賢乞能以自參貳則其賓客宜有以稱之故
求吾俊造之英勲烈之胄達朝儀而練戎事者與焉今
以洪之知國禮奉家聲以友畧之富藝文飽軍旅兩中
是選合而命之優秩寵章無所愛惜時無古今代有忠
賢苟致吾元翼於羊杜間別有陟明之典在洪可檢校
尚書職方員外郎兼侍御史充山東南道節度判官仍
賜緋魚袋散官勲如故友畧可檢校尚書屯田員外郎
兼侍御史充山南東道觀察判官散官勲如故

姚成節右神策將軍知軍事制

勅朝議郎前使持節成州諸軍事守成州刺史充本州
守捉使賜紫魚袋姚成節嘗為天平軍裨將當劉悟之
立忠勲也謀成事集爾有助焉雖授一城未足酬獎况
聞信厚勤恪宜於爪牙肘腋間居之昔漢文帝以宋昌
忠勞擢拜將軍掌宿衛今吾用汝猶前志也環拱之職
得不勉歟可毅果校尉守右神策將軍知軍事賜如故
高鉞等一十人亡母鄭氏等太君制

敕起居郎高鉞亡母滎陽郡太君鄭氏等予有侍臣咸
士之秀者或左右以書吾言動前後以補吾闕遺森然
在庭各舉其職爰思乃教知所從來豈非善稟於親行
成於內徙隣斷織訓使然耶不追封邑之滎曷顯統家
之慶可依前件

柳公綽可吏部侍郎制

勅京兆尹兼御史大夫柳公綽長吏數易為害甚多邇
來都畿未免斯弊或苛急而人重困或軟弱而姦不息

得其中者其公綽乎細大必躬親剛柔不吐茹甚稱厥
職惜而不遷然智者常憂忠者常勞亦非吾以平施御
臣下之道也尚書六職天官首之辯論官材澄汰流品
比諸內史選妙秩清詢衆用能無易公綽爾宜飾躬承
命以裴王崔毛為心苟副吾言用稱乃職而今而後亦
何往而不適哉可尚書吏部侍郎

孔戣可散騎常侍制

勅昔齊桓公心體慤怠則隰朋侍漢成帝親重儒術則

劉向從今之常侍是其選矣稱其任者唯正人乎吏部
侍郎孔戡言行謹直風操端莊肅然禮容清廟之器始
自筮仕迄于天官虛舟為心利刃在手全才具美時論
多之可使珥貂立吾左右從容侍從以備顧問隰朋劉
向豈遠乎哉可右散騎常侍

王公亮可商州刺史制

勅尚書司門郎中王公亮茂於學精於文文學之外有

枅思積切

毫符佛切

鍾

之用自佐戎律領郡符持憲為郎

皆稱厥職吾前命劉遵古張平叔為商州刺史繼有善政人用又安今爾代之守而勿失况商土瘠商人貧可以靜理而阜安不宜改張而易轍以爾精敏當自得中可商州刺史

韋觀可給事中庾敬休可兵部郎中知制誥同制

敕職之要莫先乎駁正文之選莫難於司言將使朝綱有條朕命惟允在二者得人而已中大夫使持節蘇州

諸軍事守蘇州刺史上都騎尉韋覲精微專直通乎事
典可使平奏議而坐左曹朝散大夫尚書禮部郎中上
柱國庾敬休溫裕端明飾以辭藻可使書誥命而專右
席而輪轅鑿枘各適所宜夫惟刺史守列城郎官應列
宿選任倚注非不榮重然吾左右前後方求正人如覲
敬休不宜疎遠亦猶有聲之玉無類之珠不置於珮服
掌握之間皆非其所也宜自敬謹無忝吾言覲可行給
事中散官勲如故敬休可尚書兵部郎中知制誥散官

勲如故

卷四十八

白氏長慶集卷四十八

欽定四庫全書舊要卷一萬三千九百七十九

集部

白氏長慶集卷四十九

唐白居易撰

中書制誥二

舊體。凡三十道

李愬贈太尉制

勅故特進行太子少保上柱國涼國公食邑三千戶食
實戶五百戶李愬在建中歲泚賊叛逆惟太師晟實仗
大順翦而誅之在元和朝蔡寇充斥惟爾愬實奮奇策

虜而戮之父子之功書於甲令俱為第一焯

職畧切

焯

呼圓

切

當時矧爾一登將壇六換鈇鉞坐論巖廊之道卧理

保傳之事方深倚望奄忽淪謝是用當食累歎視朝三

輟豈不以爪牙之威缺

立月切

於外股肱之痛軫於中者

乎而弔奠之命賁

六鳳切

賁

符過切之數雖加常等未表殊

恩宜以太尉之秩贈上公之袞斂俾爾被哀榮服忠孝

從先太師於九原也不其盛歟嗚呼美終必復禮無不

答昔爾之勤勞如彼今吾之寵飾如此君臣報施可謂

兩臻其極焉爾靈有知欽我追命可贈太尉仍令所司
備禮冊命賜絹二千匹布七百端米粟一千石委度支
送

田布贈右僕射制

敕朕聞古之臣子有忍死効節為忠者有不傷髮膚全
歸為孝者有不顧性命引決為忠者但問所操所蹈何
如耳豈繫去就生死之間耶噫今有重義如泰山輕生
如鴻毛死而不朽者安得不褒揚寵飾使天下聞之所

以勸孝心激忠腸然後薄者敦懦者立幸生者恥格也
故魏博等州節度觀察處置等使起復寧遠將軍守右
金吾大將軍員外置同正員檢校工部尚書兼魏州大
都督府長史御史大夫賜紫金魚袋田布其父太尉甚
賢此子鎮陽之亂弘正歿焉而布枕戈嘗膽誓報冤恥
故吾以大將軍之旗鼓鈇鉞先臣之土壤士卒盡用委
付親加勉諭人鬼之憤期一洩而甘心焉既而激發魏
師出疆臨敵事有不得已者布亦末如之何卒至於剗

心自明遺疏自列謝君於天上報父於地下可謂田氏
有孝子國家有烈臣則吾之知臣弘正之知子明矣聳
動人聽盡切力傷我懷故廢臨朝所以示哀也加禮命
所以示榮也哀榮恩禮至則至矣嗚呼曾未足以顯爾
之節不厭吾之心乎可贈尚書右僕射賜布帛三百段
米粟二千石委度支逐便支遣

韋貫之可工部尚書制

勅河南尹韋貫之善馭者齊六轡善理者正六官六官

成則百事舉故吾選賢任舊以次第補之而六卿材吾
已得五闕一不可待汝而成貫之以正行明誠為先朝
輔始以直進終以直退道有消長德無緇磷及帥湘潭
尹河洛而廉平清一之政繼聞於京師名簡吾心善入
我耳宜置朝右以之厚時風況今之尚書漢公卿也言
動可否屬人耳目焉固不專率四屬程百工備位於冬
官而已可工部尚書

太子詹事劉元鼎可大理卿兼御史大夫充西

番盟會使右司郎中劉師老可守本官充盟
會副使通事舍人太僕丞李武可守本官兼
監察御史充盟會判官三人同制

勅太子詹事劉元鼎等夫選可任而任之則用無不適
擇可勞而勞之則事無不成蓋君使臣臣事君之大端
也屬西夷乞盟求可以蒞之者歷選多士吾得三人今
以元鼎之博通師老之誠諒武之恭敏合而為用不亦
可乎爾宜臨之以莊示之以信儀形辭氣皆有可觀必

能率服彼戎不獨益敬吾使法卿憲秩寵之以遣可依
前件

許季同可秘書監制

勅大理卿許季同國朝以來有劉得威張文瓘唐臨為
大理卿有魏徵虞世南顏師古為秘書監設官之重得
賢之盛人到于今稱之今季同以明慎欽恤理刑獄以
文學博雅長圖籍由廷尉而長祕府論者榮之宜自重
其官自遠其道又思與劉張唐魏虞顏為比不亦自多

乎可秘書監

張元夫可禮部員外郎制

勅殿中侍御史張元夫官有秩清而選妙者其儀曹員外郎之謂乎凡殿內御史雖文才秀出功課高等者滿歲而授猶曰美遷有如元夫連膺二選歷彼踐此僉以爲宜況怒飛青冥翔集禁陛由茲去者十八九焉汝知之乎思有以稱可尚書禮部員外郎

楊嗣復可庫部郎中知制誥制

敕權知兵部郎中楊嗣復朕聞前代制誥中書令侍郎
舍人通掌之國朝以來或以他官兼領惟其人是用不
限於資秩職署焉予以為然多繇是選前所命者時稱
得人研實覈名次第及汝汝嗣復根於義訓播為令器
文煥發而才秀出不當汨沒於郎吏間况貞元中汝父
為中書舍人甚稱厥職今使汝繼書吾命成一家言堂
烜况遠切國華在於此舉爾宜兢兢祇勵無隕其名可庫
部郎中知制誥

張平叔可京兆少尹知府事制

勅商州刺史張平叔為人廉直為政簡惠前後歷掾邑
宰郡守而去思來暮之謠繼聞於人聽焉及副鹽鐵官
刺商雒郡會課報政亦甲於他官自貞元以來用三科
取士奉詳明政術可以理人之詔而得其名有其實者
幾何人哉平叔居其一也能効若是何用不臧故事內
史缺未補間亞尹得行大京兆事試可而即真者往往
有之故其選任日益難重爾宜稱所舉慎厥職無墮大

以勤小無急弱以緩彊夕念朝行遵吾約束可京兆少尹知府事

康日華贈坊州刺史

勅漢令軍中士有不幸死者得以棺斂傳送若是而已猶四方歸心焉矧吾褒贈以榮之惻隱以將之顯其忠撫其後亦所以激生者節豈獨慰逝者魂乎左神策軍赴行營正將試太常卿康日華領王師死王事軍書置奏朕甚悼焉可贈坊州刺史

張籍可水部員外郎制

勅登仕郎守國子博士張籍文教興則儒行顯王澤流
則歌詩作若上以張教流澤為意則服儒業詩者宜稍
進之頃籍自校秘文而訓國胄今又覆名揣稱以水曹
郎處焉前年以來凡歷文雅之選三矣然人皆以爾為
宜豈非篤於學敏於行而貞退之道勝也與之寵名者
可以獎夫不汲汲於時者可守尚書水部員外郎散官
勲如故

何士乂可河南縣令制

勅漢朝郎官出宰百里故今京邑令缺多命尚書郎補
焉朝議郎尚書水部員外郎何士乂慎檢和易介然有
常守而勿失可使從政然能佩弦以自導帶星以自勤
則緩急勞逸之間必使適宜而會理矣以爾舒退故吾
進之可守河南縣令散官如故

崔植一子官廻授姪某制

勅丞相植典職樞務亦既逾歲而能明我目達我聰左

右我躬以底于道况屬郊祀攝贊太儀寵錫之間植宜
加等而念其猶子乞用推恩既叶舊章允膺新命其姪
某可某官

王起等賜勲制

勅中書舍人王起等朕臨御之始慶賞遂行卿士大夫
遞加勲秩自武騎尉以上十有二轉自起以下十有四
人咸賜以勲舉書于籍可依前件

蕭俛除吏部尚書制

勅古者君使臣以禮臣事君以忠季代以還鮮由茲道
先皇帝創於是故在位十五載凡解相印者殆二十人
多寵為大僚或付以兵柄矧予小子宜有加焉而輔弼
之臣嘗經一日造吾膝沃吾心則思與之始終厚申恩
禮不唯勸感來者且不敢失墜先志也尚書右僕射蕭
俛忠肅孝敬佐吾為理以勤事國以疾退身本末初終
不失其道既免樞務倚為右揆加恩超等復吾前言而
俛繼上讓章至于三四敦諭煩切陳乞彌堅是用正命

為選部尚書而冠六卿統百職尚可以表吾寵重亦所以成爾謙光爾宜欽厥止慎厥終無忝我褒揚之命可吏部尚書

溫堯卿等授官賜緋充滄景江陵判官制

敕溫堯卿等今之俊乂先辟于征鎮次升于朝廷故幕府之選下臺閣一等異日入為大夫公卿者十八九焉荆門景域南北大府而堯卿等或已參軍要或方受兵書各命以官分試其事名秩章綬分而寵之夫千里之

行始于足下苟自彊不息亦何往而不屆哉可依前件
神策軍及諸道將士某等一千九百人各賜上

柱國勲制

勅古之善為國者勞不忘而賞不濫有賞一人而為僭
者有千百人而不為費者其要在當否而已不繫於衆
寡也朕自統御以來忽忽有念念天下材力之將勇敢
之士進有征討之苦退有守捍之勤藏之中心何嘗暫
忘而亟因大慶恩洽普恩某等若干人咸進勲級並可

上柱國

李彤授檢校工部郎中充鄭滑節度副使王源
中授檢校刑部員外郎充觀察判官各兼侍
御史賜緋紫制

勅萬年令李彤

徒紅切

侍御史王源中等舜以五長綏四

國若今之節制也周以十聯率諸侯若今之廉察也國
家合為一柄付有功諸侯故其陪臣選任益重或輟朝
籍授簡書者往往而有况承元有大忠於國受重任于

外使其承上莅下敬始善終實在庶僚叶力以濟今以
彤宰京邑有理劇之用如水在器撓之不濁以源中立
憲府有糾正之能如刃發硎割之無滯一可以倅七切醉
戎事一可以佐輶余招切車二職交修在此一舉臺郎憲
吏金印銀章加乎爾身無忝我命可依前件

柳公綽父子溫贈尚書右僕射竇侔父叔向贈
工部尚書薛伯高父懌贈尚書司封郎中元
宗簡父鋸贈尚書刑部侍郎皇甫鏞父愉贈

尚書右僕射韋文恪父漸贈太子少保王正
雅父翊贈太子太師范季睦父彥贈禮部郎
中八人亡父同制

勅古人有云樹欲靜而風不止子欲養而親不待向無
顯揚褒贈之事則何以旌先臣德慰後嗣心乎故朕每
施大恩行大慶而哀榮之命未嘗闕焉銀青光祿大夫
行尚書吏部侍郎上護軍河東縣開國子柳公綽父溫
等咸有令子集于中朝資父事君移忠自孝本於嚴訓

酬以寵名賜命追榮各高其等嗚呼存者不匱往者有
知斯可以載揚蘭陔居亥切之光輟風樹之歎耳可依前
件

李宗河可渭南令李玘可京兆府戶曹制

勅李宗河等夫綱一提則羣目舉源一澄則衆流清故
朝廷命官師選寮屬亦得其人矣按內史公綽奏宗河
學古修己練達道里乃乞為甸縣令玘勵節徇公通詳
典故乞為天府掾況渭南封圻之守邑戶曹賦籍之要

司位雖未高職亦不細宜乎以三語自試以一同自効
無俾爾長貽失舉之責焉可依前件

兵部郎中知制誥馮宿侍御史裴注義武軍行

軍司馬御史中丞蕭籍饒州刺史齊照鄧州

刺史渾鑣

呼對切

並可朝散大夫同制

敕某官馮宿等凡品秩之制有九自五而上謂之貴階
而宿司吾言注持吾憲籍照以降皆著勤由朝議郎一
進而及此此之所以為貴者廕及子命及妻豈唯腰白

金服赤第

數勿切

從大夫之後而已寵數既重思有以稱

之並可朝散大夫

太常博士王申伯可侍御史鹽鐵推官監察御史裏行高諧河東節度叅謀兼監察御史崔植並可監察御史三人同制

勅某官王申伯學優行茂飾以詞藻執禮定議多得其中某官高諧溫莊潔白不交勢力某官崔植外和內直通知政典在倫輩內而人皆謂之滯淹唯是三子之才

吾得於御史中丞僧孺御史吾耳目官也非清明勁正
不泥不撓者安可使辦淑慝振紀律廣吾之聰明焉並
命同升無忝是舉可依前件

溫造可起居舍人充鎮州四面宣慰使制

勅殿中侍御史溫造嘗糾天府不曠官馳軺車不辱命
況為人外和內決以無濟為心拔居殿中以備時使會
吾憂兩河間事求可諭朝旨慰人心者使焉揆効酌能
汝中吾選故不待滿歲擢為右史出則銜吾命入則記

吾言獎任不輕思有所立可依前件

高芳穎等四人各贈刺史制

勅故某官高芳穎等昔文王葬枯骨之無知也但惻隱之心不忍棄也故天下皆歸仁焉况捐軀之魂死節之骨見危授命朕甚憫之深州故小將高某等四人皆從戰陣連歿王事褒贈之數宜其有加並命追榮以光地下可依前件

崔咸可洛陽縣令制

勅度支員外郎崔咸漢以四科辟士求多略不惑彊明
決斷者任三輔令故今兩京令欽亦擇尚書郎有才理
者補之而咸在郎署中推為利用加以詞學緣飾吏能
操割洛陽必有餘力然宰大邑如烹小鮮人擾則疲魚
擾則餒寬猛吐茹其鑒于茲可洛陽令

周愿可衡州刺史尉遲銳可漢州刺史薛鯤可
河中少尹三人同制

勅前復州刺史周愿等夫勞者之思休息病者之思救

療人之本情也今兵戈甫定物力未豐如聞湘衡巴漢之間人猶疲困宜擇良二千石俾休息而救療之而愿銳鯤等前以符竹分鎮三郡皆有善政達乎朝廷舉課考能無愧是選息勞救病其有望於汝乎河中吾之股肱郡也貳尹職而佐府事者亦在得人命鯤處之無荒厥職可依前件

楊景復可檢校膳部員外郎鄆州觀察判官李綬可監察御史天平軍判官盧載可協律郎

天平軍巡官獨孤涇可監察御史壽州團練
副使馬植可試校書郎涇源掌書記程昔範
可試正字涇源判官六人同制

勅某官楊景復等士子不患無位患已不立苟有所立
人必知之惟爾等六人蘊才業文咸士之秀者果為賢
侯交辟俾朕得聞其姓名是用各進其秩分授以職若
修飾不已籌謀有聞則鴻漸之資當從此始而景復稟
訓祇命頗著令稱故因滿歲特假臺郎古者公臣之良

入補王職朝獎非遠爾其勉之可依前件

前廬州刺史殷祐可鄭州刺史制

勅某官殷祐夫吏寬信則人人不偷吏廉明則人人盡力吾觀祐之為政其近之乎前守廬江能率是道歲會課第甲於他州俾精前功且佇來効宜換符竹移牧鄭人在春秋時鄭為侯國武公善乎其職子產遺愛於人無古今更有能否聽吾用汝汝其嗣之可鄭州刺史

李德循除膳部員外郎制

勅尚書郎自奏議彌綸外凡邦之牲豆之品醴膳之數
實糾理之命文昌長佐春官卿以朝散大夫守祕書丞
上柱國李德循籍訓于台庭業官于書府揆才考第得
補為郎司膳缺員爾宜專掌可尚書膳部員外郎餘如
故

張正甫可同州刺史制

勅馮翊吾左輔也分理浩穰

汝兩切

率先風化故其選次

任內史一等而冠四方岳牧之首焉宜求吏課高位望

重者分部共理以夾輔京師尚書右丞賜紫金魚袋張
正甫自登臺閣為人謹直物論時望敬而重之及領藩
部為政寬簡將吏黎庶信而愛之所謂朝廷正臣郡國
良吏常有惠政加于是邦迨茲五年去思猶在故輟臺
輅再委郡符宜敬服新命增修舊政俾吏畏如夏日人
歸如流水慎于終始典于厥官可持節同州諸軍事守
同州刺史充本州防禦使散官勲如故

崔瑄可職方郎中侍御史知雜制

勅近歲已來副相多缺朝綱國紀專委中憲而侍御史
一人得總臺事以左右之今御史中丞德裕以中散大
夫行尚書吏部員外郎上柱國崔瑄守文無害莅事惟
精在郎署中推其才理奏補是職請觀其能因而可之
仍加寵秩操執舉錯爾無自輕可行尚書職方郎中兼
侍御史知雜散官勲如故

白氏長慶集卷四十九

欽定四庫全書薈要卷一萬三千九百八十

集部

白氏長慶集卷五十

唐白居易撰

中書制誥三

舊體。凡二十八道。

冊新迴鵲可汗文

維長慶元年歲次辛丑四月庚寅朔二十一日庚戌皇帝若曰唐有天下垂二百載列聖垂拱八荒即叙舟車之所及日月之所照威綏仁董罔不嚮化惟北之氣積

厚而靈靈發象生生為豪傑義信武烈代為名王南西
東方亦有君長較雄鬪智莫之與京國朝以來寢漬風
澤或効功伐或申婚媾同和協比以託于今今朕不德
祇嗣大統推義布信以初為常矧乎柔遠申恩睦鄰展
禮茲惟舊典垂自祖宗虔奉恭行安敢失墜咨爾九姓
迴鶻君登里羅羽錄沒密施句主錄毗伽可汗地生奇
特天賜勇智英姿所莅雄略所加諸戎雜虜愛畏柔服
風靡山立清寧一方宜人有土受天百祿時推代嗣實

來告予曰予一人實鄰冊命是用遣使朝議大夫檢校
左散騎常侍兼少府監御史大夫雲騎尉賜紫金魚袋
裴通副使朝議大夫守少府少監兼御史中丞襲魏國
公食邑三千戶賜紫金魚袋賈_{離珍切}隣等持節備物冊
為登里羅羽錄沒密施句主錄毗伽可汗於戲善必有
鄰德無不答此崇恩禮則彼竭信誠克保大義永藩中
夏昭昭天地實聞斯言

冊迴鵑可汗加號文

維長慶元年歲次辛丑某月朔某日皇帝若曰北方之
疆代有君長作殿玄朔賓于皇唐粵我祖宗錫乃婚媾
五聖六紀二邦一家此無北伐之師彼無南牧之馬兵
匣鋒刃使長子孫叶德保和以至今日咨爾迴鶻君登
里羅羽錄沒密施句主錄毗伽可汗義智忠肅武決勇
健天之所授時而後生故東漸海夷西亘山狄惠寧威
制鱗帖草偃聲有聞於天下氣無敵於荒外而能事大
圖遠納忠貢誠請仍舊姻誓嗣前好朕惟睦鄰是務柔

遠為心既降和親之命遂申飾配之禮禮物大備寵章
有加喜動陰山光增昴宿夫以迴鶻雄傑如彼慶榮若
此雖自貴曰天驕子未稱其盛雖自尊曰天可汗未稱
其美宜賜嘉號以大誇將來今遣使某官某副使某官
某等持節加冊為信義勇智雄重貴壽天親可汗於戲
釐降展親大德也進冊加號大名也宜乎思大德稱大
名懋哉始終欽若唐之休命

韋綬從右丞授禮部尚書薛放從工部侍郎授

刑部侍郎丁公著從給事中授工部侍郎三

人同制

勅尚書右丞韋綬等朕在東宮時先皇帝垂慈聖之德
念予冲蒙選端士通儒使講貫今古自禮樂刑政暨君
臣父子之道博我約我日就月將俾予今不至牆面克
荷丕訓大揚耿光實綬放公著之力也故朕嗣位未逾
時月或自郡邸或自省署徵擢寵用為丞郎給事官雖
超拜職亦俱舉師道光而心愈讓人爵貴而心益恭宜

更褒升重酬輔導以綏精粹辯博有先儒之風可作秩
宗以放端明慎重行君子之道可居憲部以公著檢敬
規度得有司之體可貳冬官於戲貞百工平五刑典三
禮皆重任清秩予無愛焉蓋欲表三子道不虛行而明
予一人德無不報也綏可禮部尚書放可刑部侍郎公
著可工部侍郎餘並如故

李諒除泗州刺史兼團練使當道兵馬留後兼
侍御史賜紫金魚袋張愉可岳州刺史同制

勅扼淮壓湘之列城曰泗與岳舟車會焉軍戎屯焉是
二郡守則易為政先是分領者多會有政歲時罷去長
吏數易人必重困宜擇良二千石救而養之以諒自澄
城長訖尚書郎中間又再為州牧三宰劇縣皆苦心卹
隱煦嫗及物操刃決滯蠹驕霍疏切有聲而愉亦學古入

仕甚自修飾河西有政次於諒焉故命愉守岳命諒守
泗仍以戎職留事憲簡章緩一加於諒諒其聽之哉異
日吾將以重官劇職處爾爾安得不副吾所急用爾所

長更宜以難理之郡自試爾各依前件

裴廩授殿中侍御史制

勅某官裴廩

夷蓋切

貞觀初張行成為殿中侍御史糾劾

巡察時以為能朕思宏貞觀之風故選御史府官亦先其精敏剛正者以爾廩動循道理語必信直勵其志節有類行成因授廩官無忝吾舉可殿中侍御史

裴通除檢校左散騎常侍無御史大夫充廻鶻弔祭冊立使制

勅語曰使於四方不辱君命可謂士矣况馳輶軒奉璽書稱天子之使以耀焜絕域者豈容易其選哉少府監裴通溫敬忠實加之謹敏有言語可任以專對有辯識可委以便宜屬北方君長來告代嗣求可以將命展禮申吾哀榮之恩者其任不細頗難其人擇臣者君而通可使命為副丞相而加金貂之貴授冊與節臨軒遣之庶乎遠而有光華且欲使絕俗殊鄰益敬吾使也可依前件

元稹除中書舍人翰林學士賜紫金魚袋制

勅仲尼曰志有之言以足志文以足言言之無文行而不遠故吾精求雄文達識之士掌密命立內廷甚難其人爾中吾選尚書祠部郎中知制誥賜緋魚袋元稹去年夏拔自祠曹員外試知制誥而能芟師街切繁詞刻楚簡

切弊句使吾文章言語與三代同風引之而成綸綍敷勿

切垂之而為典訓凡秉筆者莫敢與汝爭能是用命爾為中書舍人以司詔令嘗因暇日前席與語語及時政

甚開朕心是用命爾為翰林學士以備訪問仍以章綬
寵榮其身一日之中三加新命爾宜率素履思永圖敬
終如初足以報我可中書舍人翰林學士賜紫金魚袋

孔戣

渠為切

授尚書左丞制

勅漢詔丞相歲舉質直忠厚遜讓者蓋所以急賢俊扶
政教厚風俗也然則退藏踈賤之士苟有一善尚搜而
揚之况任久位崇才全望重而不致於急官要職者安
可以紀綱庶政而羽儀朝廷焉正議大夫守右散騎常

侍上柱國賜紫金魚袋孔戣自十年來歷中臺左曹國
庠卿寺洎藩守近侍之職各以其任皆有可稱矧又貞
白端莊淡然自立進無矜滿之色居無墮替之容求之
周行不可多得若戣者宜尚扶政教厚風俗之選也尚
書丞掌決百事樞轄六曹晉魏以還右卑於左惟有立
者可以糾吏惟無瑕者可以律人無以易戣往恭乃位
可尚書左丞散官勲賜如故

授柳傑等四人官充鄭滑節度推巡制

勅試太子司議郎柳傑等古者公府得自選吏屬今仍古制亦命領征鎮者必先禮聘而後升聞矧鄭滑帥承元輸忠仗順炳焉有大節於國奉上莅下實藉寮案以左右之而傑等或緣飾詞華或貯蓄才行揣摩思誠以待已知宜展籌謀用光慰薦傑可某官充鄭滑節度推官

韓愈等二十九人亡母追贈國郡太夫人制

勅王者有褒贈之典所以旌往而勸來也其有淑順之

德標表母儀者聖善之訓照燭子道者又有名高秩尊
祿養之不逮者霜降露濡孝思之罔極者非是典也則
何以顯其教而慰其心焉國子祭酒韓愈母某氏等蘊
德累行積中發外歸于華族生此哲人爲我蓋臣率由
茲訓教有所自恩不可忘是用啓郡國之封極哀榮之
飾嗚呼歿而無知則已苟有知者則顯揚之孝追寵之
榮可以達昊天而貫幽窅矣往者來者監予心焉可依
前件

授駱峻太子司議郎梧州刺史賜緋魚袋兼改

名立休制

勅某官駱峻桂林守土臣式方言梧為要郡兵後人困
乞廉貞吏以撫之又言峻守道抱器可以起用朕方思
良吏以活元元適副所求即可其奏官寮郡印命服嘉
名四者與之足為優異峻宜副所舉慎所為無以滋章
為聰明無以鹵莽為高簡勉率中道往安梧人可梧州
刺史

劉總弟約等五人並除刺史賜紫男及姪六人

除贊善洗馬衛佐賜緋同制

勅某官劉約等惟爾先父太師濟經武秉哲為國元臣
鎮陽之役實歿王事茂勲大節書於旂常惟爾兄司空
總象賢纂戎以續名業納忠於王室振耀其家聲而爾
約等亦能稟守其風忠恭孝友念四方之訓而不墮居
貴介之地而不驕况無器能皆可任用授郡符而加命
服者五升朝序而佐環衛者六朱轡字艱切紫綬煥赫相

望勲德之家於斯為盛嗚呼昔武子有遺愛晉人憐其子趙季有篤行漢朝寵其弟今以濟之仗順積善宜鍾慶於子孫以總之輸忠立愛可延賞於弟姪多與爵祿予無惜焉欲使天下知爾父兄忠順之若彼而國家報施之如此可依前件

王元輔可左羽林衛將軍知軍事制

勅國家設十二衛猶漢之有南北軍而左右羽林尤稱親重自諸衛而移鎮者謂之美遷左神武將軍王元輔

生勲伐之家通吏理之事佐戎臨郡率著能名以掌勾
陳而護建章備巡警而嚴羽衛大將軍事假而行之宜
勵初終副茲寵任可依前件

尚書工部侍郎集賢殿學士丁公著可檢校左
散騎常侍越州刺史浙東觀察使制

勅古者通守守土刺史按部從宜務簡今則合之故任
日崇而選日重非廉平簡直無愷悌之德者曾不足中
吾選焉某官丁公著嘗以學行禮法誨予一人報德圖

勞連加寵擢起曹書殿無而委之二職增修三命益敬
朕以浙河之左抵于海隅全越奧區延袤千里宜得良
帥俾之澄清往分吾憂無出爾右假左貂而帖中憲操
郡印而握兵符勉哉是行佇聞報政可依前件

鄭綱

伊真切

可吏部尚書制

勅天官太宰秩序常尊自昔迄今冠諸卿首非位望崇
盛者不可以處之而朕即位以來凡命故相領者三矣
迨此而四可不重乎東都留守防禦使檢校刑部尚書

兼御史大夫滎陽縣開國公鄭綱有丙吉之寬裕子產之恭惠合而為用藩輔四朝故事遺愛留于官次國之都府半在東周委以保釐人安吏肅重煩耆德入領冢卿昔魏用崔琰毛玠典吏曹一時之士以廉節自勵國朝以宋璟李乂掌選部亦能遏絕訛偽振張紀綱官無古今得人則理吾言及此欲爾繼之可吏部尚書

重授李晟

時征切

通事舍人制

勅李晟昔管仲云升降揖讓進退閑習臣不如隰朋今

之通事舍人近此選也而晟常中此選善於其職故相導通奏之節宣揚拜起之儀引而贊之不聞失禮既終喪紀宜服官常可使束帶曳裾為吾謁者可通事舍人徐登授醴泉令制

勅徐登京兆尹言登前為涇陽令清廉簡直奉法愛人請補醴泉再考其績昔子路理蒲仲尼誨曰愛而恕可以容困溫而斷可以抑姦今醴泉人與蒲相類宜用此道往訓養之歲時之間期於報政可醴泉縣令

王汶加朝散大夫授左贊善大夫致仕制

勅王汶善修其身為時良士善訓其子為國憲臣況以
時制之年知終請老不加優秩何厚吾風禮大夫七十
而致仕故我以朝散贊善二大夫之爵加乎爾身惟秩
與年兩皆得禮以茲退去亦足為榮可依前件

元公度授華陰令制

勅元公度吾欲理化萬方故自近始前授大宗正登副

啓

切印綬使牧華人翻能副吾此心選吏責課言公度廉

明有守乞宰華陰當道東西往來先是為邑者多飾厨傳舍奉賓客以沽名譽而不親吾人爾能革之足為良宰敬長畏法無慢乃官可華陰縣令

唐州刺史韋彪授王府長史楊歸厚授唐州刺史劉旻授雅州刺史制

勅韋彪等善官人者先考其能然後授以事使輪轅鑿柙各適其用則羣職庶政得以交修今以彪宦久年高勤於為政俾從優逸入補王官以歸厚文行器能辱在

巴峽勵精為理績茂課高區區萬州豈盡所用且移大
郡稍展奇才以旻早著戎功通詳吏事西南物土罔不
周知習俗從宜宜守嚴道分命以職各用所長庶乎咸
修乃官同底于理可依前件

鄭綢烏重胤馬總劉悟李佑田布薛平等亡母
追封國郡太夫人制

勅經曰立身揚名以顯父母孝之終也而綢等學文武
之道以飾厥躬可謂善立身矣居將相之位以光大其

門可謂能揚名矣夫自家所以刑國本立而後道生必待我哀榮之恩方成爾始終之孝是用啓封追號各顯乃親慰後光前孝道備矣可依前件

奉議郎殿中侍御史內供奉飛騎尉賜緋魚袋
廬商可劔南西川雲南安撫判官朝散大夫
行開州開江縣令楊汝士可殿中侍御史內
供奉充劔南西川節度叅謀二人同制

勅劔南西川雲南安撫判官奉議郎殿中侍御史內供

奉飛騎尉賜緋魚袋盧商等士之束髮立身為知已用
也無遠近無勞逸但問所務者何從者誰耳今蜀之帥
潞之長皆勤於述職妙於揀賢多得其雋材樂告以善
道故以叅其選焉或從事有勞或即戎奔命輟玄黃之
著述振銅墨之滯淹以良士而贊賢侯宜乎多成功而
鮮敗事矣勉思所立各服乃官

李演贈太子少保制

勅夫生立勲勤下以忠事上也歿加褒飾上以義答下

也忠義臻其分哀榮極其恩而君臣之道全矣故奉天
定難功臣開府儀同三司檢校兵部尚書兼左衛上將
軍御史大夫李演忠信以為幹義勇以為器器與幹合
鬱成將材故出長諸侯入統七萃拊循警衛朕甚賴之
方深倚仗遽此淪謝茲予所以當宁興念廢朝軫懷聞
輦鼓而長太息者也追崇之命宜有加焉可贈太子少
保

李諒授壽州刺史薛公幹授泗州刺史制

勅泗州刺史李諒等詩云愷悌君子人之父母朕三復
斯言往往興歎安得循吏俾父母吾人乎吾前命諒為
泗守未即路會壽守植卒因改諒守壽命公幹守泗諒
之理課前詔詳矣公幹自尚書郎連領二郡政平法一
甚便於人加以有理戎之材可付留事故輟軍保仍憲
秩而無寵之夫壽與泗皆郡之大者也諒與公幹皆二
千石之良者也以大郡委良吏不亦宜乎噫諒無忘澄
城之理公幹無替亳城之政則愷悌之化吾有望於二

郡焉諒可壽州刺史公幹可泗州刺史

柳公綽罷鹽鐵守本官兵部侍郎制

勅某官柳某昔先皇帝知爾有材元和已來應用不暇及領推管漕運之務屬陵寢郊丘之禮財給事集時乃之功宜有轉移以均勞逸况聞牢籠無遺利課督有常規今詔刑部尚書播代之亦令守而勿失朕將興理化先務根本凡百職事悉歸有司惟茲夏官實掌戎政簡稽調補今方其時司馬貳卿佐平邦國是爾本職無忘

增修可守兵部侍郎

崔元備張惟素鄭覃陸渥韋弘景賜爵制

勅崔元備等禮莫重於復土事莫大於慎終使朕以孝
敬之誠獲貢於先帝實賴左右侍從之臣服勤祗事展
四體而竭一心誠俾予無悔賞不敢忘爵不敢愛爾宜
疏封服命而揚之可依前件

劉約授棣州刺史制

勅前齊州刺史兼御史中丞劉約故太保濟之子太尉


總之弟也吾常思濟之功總之忠而嘉約之謹厚累遷至齊州刺史在官無敗事罷秩有去思念舊錄能宜當寵用况公侯之後約有通才封域之間棣為要郡委之共理誰曰不然可使持節棣州諸軍事棣州刺史依前御史中丞散官勲如故

李肇可中散大夫郢州刺史王鑑可郎州刺史
溫造可朝散大夫三人同制

勅朝請大夫使持節澧州諸軍事澧州刺史上柱國賜

紫金魚袋李肇等乃者李景儉使酒獲戾而肇等與之
會飲失於檢慎宜有所懲由是左遷分為郡守今首坐
者既復班列緣累者亦當徵還但以長吏數易其弊頗
甚況聞三郡皆有政能人方便安不宜遷換故吾以采
章階級並命而就加之蓋漢制進爵秩降璽書慰勞良
二千石之旨也爾當是命得不勉哉

白氏長慶集卷五十



總校官庶吉士 臣張能照

校對官庶吉士 臣徐如澍

謄錄監生 臣張孝基

欽定四庫全書叢要

集部

白氏長慶集卷五十二



詳校官助教臣常循

欽定四庫全書舊要卷一萬三千九百八十一

集部

白氏長慶集卷五十一

唐白居易撰

中書制誥四

新體。祭文冊文附凡五十道

贈劉總太尉冊文

維長慶元年四月某日皇帝若曰朕聞古有履忠仗順
生而大有為者又有功成身退歿而永不朽者非正氣
令德間生挺出則高名大節孰能無之哉故天平軍節

度使檢校司徒無侍中楚國公劉總降自天和生為人
傑得君於先帝叶運於昌時纂戎弓裘守土燕薊迨此
一紀北方晏然有開必先納款于我沈斷大事奮揚奇
謀捧幽都四封之圖挈盧龍三軍之籍盡獻闕下高謝
人間感動君臣驚激忠義顧妻子若脫屣視富貴如浮
雲惟道是從奉身以退仲連事成而蹈滄海子房名遂
而追赤松賢明所歸今古一致朕方改授兵柄移鎮鄆
郊命作司徒倚為左相期奮乃志將沃朕心而天不慙

遺邦失柱石夫臣戴君如元首則君視臣如股肱股肱
或虧何痛如是茲朕所以廢朝軫念備禮加恩庸建爾
于上公蓋褒贈之崇重者也嗚呼爾總尚知之乎今遣
使某官某副使某官某持節冊贈爾為太尉

傅良弼可鄭州刺史制

勅金紫光祿大夫使持節沂州諸軍事行沂州刺史兼
御史中丞騎都尉傅良弼燕翼之間紛擾之際多壘失
守孤城保全介於險中率乃麾下轉戰郊野來覲闕庭

徇義滅親忘家喪子忠勤勇烈人所難能若不褒陞何
勸來者海沂剖竹未足報功溱洧頒條可無觀政敬承
後命無替前勞可使持節鄭州諸軍事行鄭州刺史兼
御史大夫散官勲如故

河北榷鹽使檢校刑部郎中裴弘泰可權知貝
州刺史依前榷鹽使制

勅某官裴弘泰以幹蠱之才領鹽鹵之務管榷條制動
皆得宜觀其所能若有餘地可假兼職俾之牧人而河

北列城久乏良吏俗多思理政不難施亦猶凍餒之人
易為衣食今予命爾煦而飫之襦袴之謠佇入吾耳可
無知貝州刺史

崔陵可河南尹制

勅河洛千里都畿在焉俾之又安屬在尹正鳳翔隴州
節度觀察處置等使正議大夫檢校禮部尚書兼鳳翔
尹御史大夫上柱國開國男食邑三百戶賜紫金魚袋
崔陵有精敏之用潔直之操施于有政由是知名始資

州縣之勞卒致公卿之位況刺部有理行主計無倦

苦堅

切違尹右輔而鎮西郊蓋獎能報勤之旨也昔吳公為

河南守謹身廉平人服教化袁安為河南尹政令清肅
號為嚴明誰其嗣之無易陵者往為表則勿替能名可
檢校禮部尚書兼河南尹散官勲封賜如故

侯丕可霍丘縣尉制

勅賜太常寺奉禮郎翰林待詔上護軍侯丕夫執藝以
事上奉詔而處中其于出入謹身夙夜祇命比他局署

實倍恭勤既寵之以職名又優之以祿俸蓋先勞後食之義也汝其承之可守壽州霍丘縣尉依前翰林待詔勲如故

崔楚臣可兼殿中侍御史制

勅成德軍節度押衙銀青光祿大夫檢校太子賓客兼監察御史崔楚臣材膺爪士職在牙旗每祇命以奉辭必竭誠而得禮既嘉詳敏亦念恭勤式示寵名宜遷憲秩可殿中侍御史餘如故

王庭湊曾祖五哥之可贈越州都督祖未怛活

可贈左散騎常侍父昇朝可贈禮部尚書制

勅成德節度鎮冀深趙等州觀察處置等使金紫光祿
大夫檢校工部尚書兼鎮州大督府長史大夫上柱國
太原縣開國男食邑三百戶王庭湊曾祖故忠武將守
左武衛大將軍員外置同正員兼試太常卿五哥之等
鬼神有知履孝敬者福祿至王侯無種仗忠信者富貴
來我有列臣本於良胤奮發而勵節許國感激而揚名

顯親夫教必有初德無不報安有收其材而遺其本愛
其後而忘其先乎是用褒崇以宏寵澤庶使聞者起孝
作忠可依前件

崔羣可祕書監分司東都制

勅前武寧軍節度徐泗濠等觀察處置等使正議大夫
檢校兵部尚書使持節徐州諸軍事兼徐州刺史御史
大夫上柱國賜紫金魚袋崔羣天授至寶為國重器始
自修己移於事君輔弼藩宣不失其道及離征鎮召赴

闕廷方登道途遂遘疾恙正在頤養之際豈任朝謁之勞誠宜許以便安不可闕其祿食而移秩外史分曹東周加寵優賢無易於此且有後命俟其有瘳可祕書監分司東都散官勲賜如故

董昌齡可許州長史制

勅將仕郎權知泗州長史無殿中侍御史賜緋魚袋董昌齡頃為宰邑今贊郡符皆聞約已之名每展在公之節稽其器局允謂廉能議以稍遷用彰勤効可許州長

史兼侍御史散官勲如故

柳經李褒並泗州判官制

勅徵事郎前河南縣尉柳經儒林郎試太子通事舍人
李褒等瀕淮列城泗州為要控轉輸之路屯式遏之師
故府有寮軍有倅選擇補署得聞於朝廷而經等皆有
所長宜當是選守臣置奏因而可之仍加秩命用示優
寵經可監察御史充泗州團練副使散官如故褒可試
太常寺協律郎充武寧軍節度泗州兵馬留後判官仍

改名銜散官勲如故

張諷等四人可兼御史中丞侍御史監察御史

同制

勅義成軍節度馬步都知兵馬使光祿大夫檢校太子
詹事兼侍御史上柱國張諷等御史府自中執憲暨察
視之官皆顯秩也唯懷材而展効者可以授焉爾等昨
領偏師出疆赴難指蹤而去摩壘而還忠勇勤勞宜有
加獎故以憲職第而寵之可依前件

啖異可滁州長史許志雍可永州司戶崔行儉
可隋州司戶並准赦量移制

勅守袁州司馬員外置同正員啖異等有司奉新制明
舊章凡負疵瑕必需慶澤况爾等各有才用多淹歲時
譴累重輕逋從恩貸班資遠邇率以例遷如聞進修豈
忘牽復可依前件

程執撫亡父懷信贈太保李佑亡父景略贈太
子少傅栢耆亡父良器贈太子少保白餘盛

亡父孝德贈太保同制

勅中散大夫檢校右散騎常侍兼右神武軍大將軍知
軍事御史大夫上柱國河東縣開國男食邑三百戶賜
紫金魚袋程執撫父贈太子太保懷信等咸有忠勲播
為先德悉承義訓垂在後昆故吾令臣皆乃愛子襲弓
裘而稟詩禮猶水木之有本源將使天下之為人子者
感恩天下之為人父者知勸宜加寵贈以表顯揚可依
前件

嚴謨可桂管觀察使制

勅漢置部刺史掌奉詔條糾吏理蓋今觀察使職耳桂
林秦郡也東控海嶺右扼蠻荒自隋迄今不改戎府地
遠則權重俗殊則理難馭而化之非才不可朝議大夫
前守祕書監驍騎尉賜紫金魚袋嚴謨嘗守商洛刺黔
巫州部縣道謚然安理是能用寬猛相濟之政撫夷夏
雜居之人故也跡其往効式是南邦况爾操行端和文
學精茂賓寺書府善于其官勉副前言俟申後命可使

持節都督桂林諸軍事守桂州刺史兼御史中丞桂州
本管都防禦觀察處置等使散官勲如故

杜式方可贈禮部尚書制

勅生有寵祿歿有褒崇此王者所以明終始之恩厚君
臣之道也故桂州本管都防禦觀察等使正議大夫使
持節都督桂州諸軍事守桂州刺史兼御史中丞上柱
國南陽縣開國男賜紫金魚袋杜式方虔襲台庭任當
垣翰服名教乃保家之子樹風聲為守土之臣盡禮事

君勞心奉職奄忽淪逝念之惻然况近屬連姻遠藩捐
館聞訃之命實悼中心贈飾之典宜加常等俾趨榮於
八座用賁寵於九原可贈禮部尚書仍賻符過切布帛二
百段米粟二百石委度支逐便支遣

武昭除石州刺史制

勅某官武昭王師伐蔡爾在行間致命奮身挑戰當寇
忠憤所感卒獲生全求之軍中不可多得司馬以爾信
直謹厚可領邊城爾宜酬乃已知副我朝獎撫獯戎雜

居之俗安離石重困之人勉而莅之其任不細可石州
刺史

梁希逸除蔚州刺史制

勅某官梁希逸頃為蔡將陷在賊庭知有君臣不顧妻
子率其所屬當戰陣前反旆倒戈翻然歸我忘家之士
希逸有之間從司空再平淮右指蹤銜命皆稱所使可
以移用俾之守疆北邊列城蔚為衝要雄右軍號務無
錢刀時流切勤選能俾乃兼領宜思來効以續前勞可

蔚州刺史兼橫野軍使并知本州鑄錢事

盧元勳除隰州刺史制

勅盧元勳乃者鎮帥身喪正承元納款之際栢耆將命之初軍情洶然未知嚮化而元勳挺身奮臂出於衆中指明安危分別逆順顏色不撓聲氣甚厲言行事立朕甚多之雖有優升未酬義烈宜以一郡寵而旌之用勸四方聞其風者可隰州刺史

楊孝直除滑州長史制

勅揚孝直早以材力從戎冀方專習武經通知吏事承
元移鎮孝直實來詢謀驅馳有所裨助軍郡之佐寵秩
非輕用答忠勞以明勸獎可滑州長史

張嘉泰可延州長史制

勅前丹州司馬張嘉泰一從戎旅多歷歲時奉職有勞
率身無過軍部長佐資秩不卑自丹轉延頗為優穩題
輿便道往守乃官可延州長史

魏玄通除深王府司馬制

勅魏玄通有禦侮之才扞城之略服勤戎職善守邊州
訓旅牧人有可稱者夫文武迭用出入序遷所以關才
能而均勞逸也爾宜解綬郡邸曳裾王門飾躬慎儀以
奉朝謁可依前件

楊造等亡母追贈太君制

勅通事舍人楊造翰林待詔某亡母等生播徽華歿留
儀範訓保家之子為有國之臣或相禮彤庭或待詔金
馬咸居禁近率有忠勤風樹之心必憂深而思遠蓼蕭

之澤宜自葉而流根並啟邑封各從子貴揚名之孝與
汝成之可依前件

張值李翱等二十人亡母追贈郡縣夫人制

勅壽州刺史張值亡母某氏等夫忠於上者教有所自
仁於下者恩有所延孝理之風實繇此作當今良二千
石皆與朕共理雖祿不逮養而名可顯親將慰匪義之
心宜流自葉之澤俾從子貴咸贈邑封

陳中師除太常少卿制

勅尚書吏部郎中兼侍御史陳中師早以體物之文待
問之學中鄉里選第甲乙科及筮仕立身皆有本末不
背俗以矯逸不趨時以沽名從容中道自致聞望累踐
郎署再叅憲司官無卑崇事無簡劇如玉在佩動必有
聲為時所稱何用不可朕以立國之本禮樂為先今之
太常無掌其事貳茲職者不亦重乎歷代迄今謂之清
選往復是命佇觀有成予方急才爾寧久次可太常少
卿

衢州刺史鄭羣可庫部郎中齊州刺史張士階

可祠部郎中同制

勅某官鄭羣等今之正郎班望頗重中外要職多繇是
選故其所選不得不慎必循名實而後命之羣與士階
久典名郡謹身化下有循吏之風會課陟明宜當是選
國之大事在祀與戎一掌祠曹一司武庫各領其要爾
宜敬之羣可庫部郎中士階可祠部郎中

元稹可太子左諭德依前入蕃使制

勅通事舍人元稹東宮之有諭德猶上台之有騎省也
清班優秩所選非輕朕前遣使臣往修戎好以稹言信
行敬命為介焉揚旌出疆反駕奔命有所啟奏多叶便
宜乃知得人可以卒事故加是命以寵勸之可太子左
諭德依前入蕃使

盧昂量移虢州司戶長孫鉉量移遂州司戶同
制

勅萬州司戶叅軍盧昂等頃負疵瑕各從譴謫或遠竄

荒裔或未復班資既逢蕩滌之恩俾及轉遷之命况聞
修省以克已固將校試而用能吾無棄人汝宜自効可
依前件

李石楊穀張殷衡等並授官充涇原判官同制
勅李石等用武之地曰涇與原合為一鎮控扼夷虜朕
授布鉞責其成功布乃祇惕受命思有以自輔者因上
言石穀殷衡等學業才畫堪置幄中分務列官咸可其
請而布憂邊甚切選士必精爾宜各竭所能為知己用

可依前件

李演除左衛上將軍制

勅王者法勾陳設環列非勲勤之將信近之臣則何以
久張爪牙轉置肘腋者也某官李演嘗從德宗皇帝南
蒐于梁籍名功臣謂之定難洎出分戎律入拱宸居內
外周旋不懈于位交戰之下周廬肅然今之轉遷示益
親信移領左廣仍叅夏卿夫八屯之警巡七萃之勤惰
爾為其正盡得察之宜惜前勞無墮乃力可依前件

康昇讓可試太子司議郎知欽州事兼充本州

鎮遏使陳倓

徒監切

可試太子舍人知巒州事

兼充本州鎮遏使李顥可試太子通事舍人

知賓州事兼賓澄巒橫貴等五州都遊弈使

馮緒可試太子通事舍人知田州事充左江

都知兵馬使滕殷晉可試右衛率府長史知

灋州事兼充左江都知兵馬使五人同制

勅容州本貫經略招討左押衙兼右廂兵馬使康昇讓

等有奉職徇公之勤有理戎殄寇之効其帥公素上章以聞吾方念勞爾宜受賞況容之諸郡有大小郡之無職有重輕量能第功分命而往噫方藩雖遠朝聽甚卑有善必聞無功不錄吾言及此欲爾知之可依前件

西川大將賀若岑等一十二人授御史中丞殿中監察及諸州司馬同制

勅丞相鎮蜀志在憂邊俾靜蕃蠻實資將校故加寵任以責成功其官其等若干人類例勲勞進登班秩憲官

名重郡佐祿優叅以命之足為榮獎爾宜恭承主帥慎
守封疆戮力一心無落戎事可依前件

前右羽林將軍李彥佐服闋重除本官兼御史
中丞知軍事制

勅軍有羽林用法星象統之爪士以拱宸居某官某前
以忠勞選登戎衛而能訓勇力之士以備時使申誰何
之令以奉徼巡夙夜祗嚴不懈于位既終喪紀宜復官
常假中執憲之名行上將軍之事勉修舊職用副新恩

可依前件

奉天縣令崔鄩可倉部員外郎判度支案制

勅奉天縣令崔鄩大凡南宮郎無非慎選者也况官之屬有堆案盈几之文有月計歲會之課故員外郎不可逾時缺不待滿歲遷事劇才難斷可知矣而鄩自操白簡宰赤縣繩舉違謬惠養鰥嫠皆有善聲著于官次宣能於彼而不能於此乎爾宜率廩人佐計務決繁析滯期有可觀可依前件

翰林待詔李景亮授左司禦率府長史依前待

詔制

勅某官李景亮夫執藝事上者必揆日時計勞績而後
進爵秩以旌服勤况待詔宮闈飾躬晨夜比於他職宜
有加恩宮坊衛官以示優獎可依前件

故鹽州防狄兵馬使康太宗贈鄧州刺史制

勅故某官康太宗嘗習韜鈴夙稱拳勇使之訓旅能叶
武經使之守疆能著成績永言殂謝宜及褒榮俾追寵

於朱轡庶知恩於黃壤可贈鄧州刺史

劉總外祖故瀛州刺史盧龍軍兵馬使張懿贈
工部尚書制

勅故某官張懿德善者將啓後人忠孝者克揚前烈有
美必復宜其然乎而懿仗忠履義體仁養勇學究韜略
藝窮騎射負幽燕之勁氣雖振其名有將相之長才不
得其位命屈當代慶流後昆有外孝孫為吾賢帥以忠
許國以順克家揚名顯親自義率祖推恩外族歸美前

修俾追八座之榮以輟九原之歎可依前件

劉總外祖母李氏贈趙國夫人制

勅李氏族茂本枝行光內則柔明繕性和淑保身輔佐
良人克諧家道訓成賢女作相令門善積於中福延於
後段公威德當流慶於外孫令伯孝心願推恩於祖母
式遵贈典用贊德芬宜從大國之封追正小君之命可
贈趙國夫人

蕭俛一子廻授三從弟伸制

勅吏部尚書蕭俛頃在台庭時逢郊禮大行慶澤先及
輔臣當延賞於脩嗣願推恩於友愛厥有典例因而從
之咨爾弟伸可恭成命可河中府叅軍

賈璘

離吟切

入迴鶻副使授兼御史中丞賜紫金

魚袋制

勅少府少監賈璘行人之官官必有介所以敬王事而
重國命也以爾璘稟訓台鼎飾躬搢紳自登班行多歷
年祀恪勤官次保守令名斯可以卒貳使臣諭申朝旨

宜假憲秩仍加命服以示兼寵俾之出疆况繼好二邦
奉辭萬里副車之任選亦不輕茲吾使能期爾復命可
依前件

張杞授廬州刺史兼御史中丞制

勅廬龍軍節度判官檢校刑部郎中張杞司徒總言爾
從事於幽薊之間有年歲矣嘗委事任備觀器用務叢
而益辨職久而彌勤頗出輩流宜加獎擢况公侯之嗣
幕府之英餘慶所鍾有才如是今以名郡寵而任之旌

善勸能仍無中憲可廬州刺史

韓公武授左驍衛上將軍制

勅朝散大夫檢校左散騎常侍兼右金吾衛將軍御史大夫上柱國賜紫金魚袋韓公武我元老之令子也孝於家忠於國故出則秉旄鉞入為執金吾寵任益崇謙敬彌著而勤於夙夜疾癘所侵上陳表章乞就頤養夫環衛之列心膂之臣雖親信之寄則同而勞逸之間或異宜輟繁重俾從便安可檢校左散騎常侍兼左驍衛

上將軍御史大夫散官勲如故

姚元康等授官充推官掌書記制

勅朝散郎行祕書省祕書郎姚元康儒林郎試太常寺
協律郎鄭懿等益部浮陽皆大征鎮也文昌全略皆賢
將相也而能以禮聘士以職任才多聞得人咸樂為用
况爾等籌謀文藻各負所長苟能贊察無掌奏記孜孜
不怠翩翩有聲慰薦褒升其則不遠元康可試左武衛
倉曹叅軍充劔南西川觀察推官散官如故懿可試左

金吾衛兵曹參軍充橫海軍節度掌書記散官如故

楊玄諒等三十人加官制

勅右神策軍忻州行營兵馬使試太常卿楊玄諒等夫才不錄則勸善之道廢勤不賞則念功之典缺而玄諒輩凡三十人咸列禁戎遠從征討臨難有身先之勇奔命無道弊之勞宜以祿秩酬其忠効所謂材不失選賞不逾時亦欲使為善者不疑有功者速勸也可依前件李益王起杜元穎等賜爵制

勅李益等去年春朕以陵寢事大哀惶疚心而益等齋
慄奔走各率其職俾予孝道刑于四海何嘗一日而忘
之即命有司舉常典凡爵之高下視執事之重輕有司
亦能遵我成命第而次之進給益封無有不當由益而
下爾宜欽承可依前件

王計除萊州刺史吳晔

于鬼切

除蓬州刺史制

勅王計等咸以材略載筆從軍藝學智謀需然足用多
歷年祀備嘗艱危進退周旋不聞失道司徒弘正詳奏

以聞因以竹符分命試吏而萊蓬二郡各介一方牧人者但不擾其心不奪其力則雖華夷南北土物不同皆可以自足自遂矣宜用此道往安養之可依前件

義武軍奏事官虞候衛紹則可檢校祕書監職如故制

勅某官衛紹則服勤藩鎮敷奏闕庭奉主帥之表章達軍府之情狀嘉其忠効宜可褒升俾洽新恩用充舊職可依前件

深州奏事官衛推試原王友韓季重可兼監察御史充職制

勅某官韓季重上將臨戎陪臣將命詳其奏報頗盡事情特加寵章用獎勞効王官憲職以示兼榮可依前件
袁幹可封州刺史兼侍御史制

勅安南兵馬使封州刺史兼監察御史袁幹委質藩方穩知戎旅嘗驅寇盜累著功勞故命遷領郡符超升憲簡足以安荒俗耀遠人敬而承之無替前効可封州刺

史

華州及陝府將士吉少華二千三百三十五人

各賜勲五轉制

勅某官吉少華等距河重鎮分陝近藩俾遏寇虞實資
士旅勞既同力賞宜徧行次第其名書于勲籍可各賜
勲五轉

祭迴鵲可汗文

維長慶元年歲次辛丑月日皇帝遣使朝議大夫檢校

右散騎常侍兼少府監御史大夫雲騎尉賜紫金魚袋
裴通致祭于故愛登羅汨沒密施毗伽保義可汗之靈
粵以英武之姿雄奇之策撫有九姓制臨一方氣吞諸
戎名播上國況能嚮風納款繼好息人代為親鄰歲入
職貢方賴威略共清寰瀛倚為長城永固中夏而天殲
驕子國喪名王奪氣色於陰山實精光於昴宿凶訃云
至悲懷用深故遣使臣往將國命展弔奠之禮申哀榮
之恩猶有明靈當鑒誠意尚饗

欽定四庫全書



白氏長慶集
卷五十一

白氏長慶集卷五十一

欽定四庫全書薈要卷一萬三千九百八十二

集部

白氏長慶集卷五十二

唐白居易撰

中書制誥五

新體。凡五十道

京兆尹盧士玫除檢校左散騎常侍兼中丞瀛
漢二州觀察等使制

勅夫疆理天下壤制四方乘時省置何常之有故方隅
未寧務先經略則專委方伯以總統之及兵革甫定思

宏風化則並命連帥以分理之朕常以幽薊一方環封
千里延袤廣漠專制實難屬元戎改轅新帥進律因而
置制以叶便宜蓋王者施張變通之要也京兆尹盧士
攻為人端和為政寬簡自尹京輦人甚便安今司徒總
籍甚爾名叶從人望河間列郡乞委士攻因而可之必
易為理况新造之府經始之政勞徠安輯是爾所能俾
珥左貂無執中憲寵任不細勉哉是行可依前件

武寧軍軍將郭暈等五十八人加大夫賓客詹

事太常卿殿中監制

勅某官某頃以齊冠發狂王師致討武寧裨將五十八人雖有元戎指蹤制勝實由衆校同心許國合力成功宜以憲秩儲寮寺卿府監舉申賞典用益勲庸可依前件

贈僕射蘇兆男三人妻兄一人並被蔡州誅戮各贈太子贊善大夫等制

勅故某官男等淮寇之起爾陷其中能守父訓不失臣

節竟遇逢螽蟊並為鯨鯢蔡將死而心傾劍雖埋而氣在
毒延禦侮禍及維私將賁幽魂宜追寵命俾贈青宮之
秩用伸赤族之冤可依前件

王士則除右羽林大將軍制

勅羽林所設上法星文軍衛之中號為雄重稱茲選任
不易其人左驍衛將軍王士則勲戚之家義方之子發
身學劍餘力知書早踐班榮累叅環列職近而身彌檢
慎任久而心益恭勤卑以自居勞而不伐况一備禁衛

四為偏將滯於久次宜有超升俾領上軍仍遷右廣統
良家之騎士訓期門之材官寵任不輕無墮於事可右
羽林軍大將軍

前穀熟縣令李季立授奉天丞兼監察御史充
迴鶻使判官制

勅某官李季立蕃國通聘使臣告行上請屬寮同役王
命以爾常為令長頗有幹能加之恪恭可備選擇假威
憲職兼命邑丞足示優榮勉勤任使可依前件

李懷金等各授官制

勅博野鎮都虞候殿中監李懷金等戮力戎行叶謀王
事既展扞城之効彌章奉國之心不加寵榮何勸忠勇
敬授爵命勉思令圖可依前件

王日簡可朝散大夫德州刺史制

勅前代州刺史代北軍使王日簡吾聞任有才則事集
獎有勞則功勸以日簡嘗為代守軍睦人安旌効所能
可居要地是用超登階級遷領郡符勵精壹意其聽吾

言夫主憂則臣勞時危則節見今寇戎暴起封域未寧
是忠臣奮奇謀烈士展殊効之日也朝立功而夕受賞
汝其念之哉可德州刺史

薛元賞可華原縣令制

勅前大理丞薛元賞甸服之制也樹以尹正承以令長
上下有統而理化行焉以元賞前為廷尉丞察獄評刑
頗聞敬慎寺卿奏課邑宰缺員故移欽恤之心使布惠
和之化上承爾長下字吾人無或越思而乖統理可華

原縣令

王承林可安州刺史制

勅安陸古鄖國也介荆漢之間承軍旅之後宜得謹良
長吏以養理之也前相州刺史王承林比刺安陽勤修
其職錄勞獎善故申命焉况爾生勲伐之家早階寵祿
宜自修立以光大其門爾當思勤儉以檢身務廉平以
臨下率吏用禮勸人歸農勿偵丑正切勿佻一遵吾之約
束可安州刺史

嚴綬可太子少傅制

勅東朝保傅歷代尊崇漢擇名儒任先疏廣晉求耆德
選在山濤實資六傅之賢用宏三善之道檢校司徒兼
太子少保嚴綬文雅成器恭謙致用出領重鎮以帥諸
侯入為具寮以長卿士歷踐中外備嘗艱虞殆三十年
勤亦至矣況理心以體道知命而安時是謂教誨之人
可領調護之任由保遷傅爾其敬之可太子少傅

源寂可安王府長史

勅義成軍節度判官檢校兵部員外源寂早膺慰薦累
展才能謀畫有終恭勤無怠守臣推善列狀升聞可使
束帶立朝廷曳裾遊藩邸俾從賓佐入補王官

鄭枋可河中府河西主簿制

勅鄭滑觀察推官試太子通事舍人鄭枋名列士林職
叅軍府修身無闕從事有勞既展効於即戎宜試能而
補吏俾之劔邑庶有可觀可依前件

喬弁可巴州刺史制

勅權知巴州刺史喬弁前假竹符俾臨巴郡一意為理
三年有成州人借留廉使置奏既因會課宜及陟明九
仞之功無虧一簣無徇真授而怠初心可巴州刺史

薛戎贈左散騎常侍制

勅夫有名於時有勞於國盡忠以事上遺愛而及下則
必生享寵祿歿加褒崇所以旌善人而勸來者故浙東
觀察使越州都督兼御史中丞薛戎挺英於冠族擢秀
於士林凡踐官榮皆著聲績及授符節委之察廉自江

而東政成人又老而將智病且知終方覲闕廷忽捐館
舍是用廢朝軫念加賻申恩俾增九原之光追備八貂
之列可依前件

辛弁文可淄州長山縣令制

勅趙州臨城縣令辛弁文既有英材又知臣節遁逃寇
難奔走道途言念忠勞宜加恩獎俾換銅墨移宰長山
可依前件

知汴州院官侍御史盧蒙可檢校倉部員外郎

陝府院官盧台可兼侍御史鄭滑院官李克
恭可試大理評事獨孤操可衛佐並依前知
院事同制

勅鹽鐵官漕運職小大遠邇羅布於四方自丞相播兼
領以來而撮大綱覆羣吏職以能進秩由課遷法無僭
差人有懲勸今台蒙克恭操等咸當自舉分命以官勉
副已知無忝成命可依前件

王智興可檢校右散騎常侍兼御史大夫充武

寧軍節度副使領本道兵馬赴行營制

勅沂州刺史御史大夫王智興李愿李愬之鎮武寧也
汝為裨將勵節忘身濟成大功汝實有力獎其誠効擢
授郡符海沂之間又著聲績宜加新命以寵舊勞仍提
銳師往副戎律夫將之撫衆如子弟則衆之視將如父
兄苟推赤心而無疑必蹈白刃而不悔勉親士卒佇翦
寇戎可依前件

田羣可起復守左金吾衛將軍員外置兼澶州

刺史制

勅前左武衛將軍田羣忠謹立身韜鈴嗣業自叅戎衛
尤見恭勤而燕薊之間澶為要郡公侯之後羣有令名
俾分符竹之榮佇濟弓裘之美宜奪情禮起而用之

楊於陵母亡祖母崔氏等贈郡夫人制

勅大孝存乎始終殊恩被於幽顯追榮之命安可廢耶
戶部尚書楊於陵亡祖母崔氏等風範有初光塵未昧
發揮婦道標表母儀施及孝孫陟于高位夫蘊德者垂

裕于後揚名者光昭其先俾彰積慶於中故許推恩而
上各從寵贈用顯貽謀可依前件

邵同貶連州司馬制

勅朝議大夫守衛州刺史兼御史中丞邵同寵在專城
職當守土不承制命擅赴闕庭違越詔條叛離官次將
懲慢易宜舉憲章可連州司馬仍馳驛發遣

鄭公達可陝州司馬制

勅朝議郎守原王府長史上柱國賜緋魚袋鄭公達衆

推士行時許吏才自列班榮尤彰恭恪夙夜匪懈春秋
已高宜罷曳裾之勤往贊坐棠之理是為優秩用答令
名可守陝州大都督府右司馬散官勲賜如故

劉泰倫可起復謁者監制

勅朝議郎前行內侍省內謁者監上柱國賜紫金魚袋
劉泰倫古者有中涓謁者皆侍奉親近之臣也今之寵
秩亦由舊焉况泰倫有行藝可以飾身才幹可以掌務
監臨內署朝請中闡謹密端和甚宜厥職久于其事無

之實難宜加進秩之恩仍舉奪情之典勉承獎任勿替
初終可起復朝議大夫行內侍省內謁者監

王師閔可檢校水部員外郎徐泗濠等州觀察

判官制

勅前徐泗濠等州觀察支候朝議郎殿中侍御史內供
奉上騎都尉賜緋魚袋王師閔朕以師律授智興智興
以軍書辟師閔才既為知己用官不俟滿歲遷所以使
能而責理也然則贊廉察安戎旅既命之後吾有望於

爾焉勉副所從佇展來効可檢校尚書水部員外郎兼
殿中侍御史充徐泗濠等州觀察判官勲賜如故

薛從可右清道率府倉曹制

勅三品子薛從惟汝父平守吾藩鎮能以忠力殄寇安
人疇庸既以啓封延賞亦宜及嗣勉承義訓無忝寵章
可朝散郎行右清道率府倉曹叅軍

義武軍行營兵馬使高從政等五人河東節度
行營兵馬使傅義等二十四人並破賊可御

史大夫中丞侍御史制

勅古者賞不逾時所以勸勲庸也爵有加等所以激忠
勇也而某官高從政等以義武之師統晉陽之甲前路
白刃中推赤心大摧賊徒連告戎捷超庸速賞爾實當
之故視軍功通遷憲秩破竹之勢其思有終可依前件
故奉天定難功臣試殿中監陳日榮等一十二
人可贈商鄧唐隋等州刺史制

勅春秋崇褒善之義國家厚追榮之寵其身歿而名不

殞時去而恩未及者大司馬得稽勲籍舉而行之故某
官某等凡十二人按狀徵書宜加寵命飾終之典其可
廢乎可依前件

段斌宗惟明等除檢校大理太僕卿制

勅義武軍節度都押衙兼侍御史段斌衙前虞候檢校
太子賓客宗惟明等寇虞未平將校方用宜以爵賞勸
其忠勞而斌奔命獻俘惟明奉章告捷各勤乃事咸造
于庭並加寵榮以示優獎斌可試太僕卿依前兼侍御

史惟明可檢校大理卿餘各如故

戶部尚書楊於陵祖故奉先縣主簿楊冠俗可
贈吏部郎中於陵奏請迴贈制

勅故某官楊冠俗貽厥孫謀垂裕後世揚其祖美不忘
先也以冠俗之棲遲下位道屈於時以於陵之光大其
門慶鍾于後生不逮事歿有追榮宜加義率之心用舉
飾終之典可贈吏部郎中

故光祿卿致仕李恕贈右散騎常侍制

勅故某官某國老之子藩臣之兄嘗列棘以承家竟懸
車而捐館生加爵寵歿及褒榮茲惟舊章用慰幽宥

劉悟妻馮氏可封長樂郡夫人制

勅古者有策名命婦賜號夫人蓋積善於閨門而受封
於國邑也澤潞節度使劉悟妻馮氏傳芳茂族作合良
臣成此忠貞之功因於輔佐之力禮從夫貴慶叶家肥
俾開大郡之封以正小君之命可封長樂郡夫人

夏州軍將二人授侍御史制

勅某官某等早稱武藝久隸軍麾稟命元戎服勤王事
或千里移鎮從為紀綱或十乘啓行倚為肘腋繇歷年
月積成勤勞不加寵榮何勸忠効並命憲職宜敬承之
並可兼侍御史餘如故

日試詩百首田夷吾曹璠等授魏州兗州縣尉
制

勅乃者魏兗二帥以田夷吾曹璠善屬文貢置闕下有
司奏報明試以詩五言百篇終日而畢藻思甚敏文理

多通賢侯薦延宜有升獎因其所貢郡縣各命以官而倚馬爰來衣錦歸去以文得祿亦足為榮可依前件

衛佐崔蕃授樓煩監牧使判官校書郎李景讓授東畿防禦巡官制

勅某官崔蕃等咸因文行自致班序或佐衛蘭錡或典校蓬山各從所之將展其用夫司牧垆野備禦都畿所以班馬政而遏寇虞也茲皆重務爾勉贊之可依前件李勣李愿薛平王潛馬總孔戢崔能李翱李文

悅咸賜爵一級并廻授男同制

勅封爵之設在乎賞勸有以褒德有以序勤聳善興功
實由茲道而某官李愬等或望崇台鼎或委重旌旄爰
及藩條共分憂寄有勞于事無怠于心宜疏爵以啟封
許推恩而及嗣祇受厥命永孚千休可依前件

故工部尚書致仕杜羔贈右僕射制

勅故某官杜羔生於仁族發為公器敦厚孝友本乎天
性文學政事出於餘力自立朝右藹然素風司諫平刑

駁議廉問凡所踐歷不懈于位以年致政以疾就第出處進退皆叶時中遽此淪謝惻惻興念夫生有榮祿歿有寵贈所以極君道厚時風亦聖人有始卒之義也宜追端揆以申褒飾猶有精爽知吾不忘可贈尚書右僕射

幽州兵馬使劉棟除左驍衛將軍制

以兄劉
悟奏請

勅某官劉棟夙負氣槩早習騎射才推燕趙之士學究孫吳之書加以忠厚可當任用况有令弟為吾信臣節

著艱貞情鍾友愛夫寵寄於外莫重於藩垣委任於中
莫親於禁衛加此一職寵示二人豈不為榮季出叔處
可左騎衛將軍

前幽州押衙瀛州刺史劉令璆除工部尚書致

仕制

勅某官劉令璆

渠尤切

勲伐之家弓裘之嗣嘗修戎職亦

領郡符迨此遲暮知有止足夫壯而奮發以忠事國老
而知退以道安身人所難能理宜嘉尚俾超崇秩以寵

高年可工部尚書致仕

盧衆等除御史評事制

勅幽州節度判官盧衆等幽薊重鎮盧龍舊軍是吾北
門委在上將實資寮佐以濟謀猷爾等或叅務戎旃或
專司奏記俱因事任各展才能而御史府官廷尉寺吏
用申褒獎以勸忠勤勉奉元戎佇成嘉績

張偉等一百九十人除常侍中丞賓客詹事等

制

勅盧龍軍押衙兵馬使什將隨軍某等夫爵賞行於上
則忠勞勸於下有國之典其可廢乎吾思薊缺首將及
吏合計衆力鎮寧一方繇以歲年積成勤效令以朝右
貴秩言坊清班舉為寵章用申酬獎

梁璲

徐醉切

等六人除范陽管内州判司縣尉制

勅盧龍軍節度要籍梁璲等咸以幹能早膺任使各叅
軍要同濟戎功言念恭勤宜加優獎郡掾邑佐分而命
之仍兼舊職勉申來効可依前件

渤海王子加官制

勅渤海王子舉國內屬遣子來朝祇命奉章禮無違者
夫入修職貢出錫爵秩茲惟舊典舉而行之

石士儉授龍州刺史制

勅石士儉東川帥涯上言士儉久習武藝兼通吏事可
使為郡責成其功吾聞江油巴夷雜處勿以遐陋而忘
緝綏奉法愛人無負知己可龍州刺史

韓萇授尚輦奉御制

勅韓長局分六尚職奉七輦茲惟優秩列在通班以爾
立身頗恭守事甚謹宜有所獎可升於朝可尚輦奉御
孟存授成都府少尹制

勅孟存嘗叅劇務亦牧疲人咸有能名得於主帥三蜀
征鎮屯于成都雖有忠賢委為尹正至於贊修庶務通
統諸曹承而貳之實資亞理勉勤厥職無累所知可成
都府少尹

杜元穎等賜勲制

勅中書舍人杜元穎等有位于朝有勞于事不加慶賜
何勸恪勤宜各策名列于勲籍可依前件

商州壽州將士等賜勲制

勅某官某等夫勲者所以馭貴叙勞亢身庇族非因大
慶不降殊恩爾皆委質從軍服勤事國宜按勲籍分而
賜之可依前件

內侍楊志和等授朝散大夫制

勅楊志和等咸分要職列在內司慎靜檢身恭勤守事

宜以章綬命為大夫佩服寵光爾無失墜可依前件

內常侍趙弘亮加勲制

勅內常侍趙弘亮等列名禁籍祇命宮闈多歷歲時積
成勞効宜加勲賞以洽恩榮可依前件

烏行初授衛佐制


勅烏行初重脣之子早凜義方詩禮弓裘式聞不墜賞
延之典本勸忠勲環衛之官無資慎擇非唯父任亦以
才升可佐衛曹叅軍

烏重胤妻張氏封國夫人制

勅古者夫為大夫則妻為命婦況在小君之位未加大國之封豈唯有廢徽章抑亦無勸忠力也某官某妻某氏以鴈鳩之德作合邦君輔成勲猷馴致爵位雖從夫貴未授國封今以南陽本邦善地錫為湯沐加號夫人茲乃殊榮足光閨閭可封鄧國夫人



白氏長慶集卷五十二



總校官庶吉士

臣張能照

校對官庶吉士

臣徐如澍

謄錄監生

臣張孝基

欽定四庫全書薈要

集部

白氏長慶集卷五十三

四

詳校官助教臣常循



欽定四庫全書薈要卷一萬三千九百八十三

集部

白氏長慶集卷五十三

唐 白居易 撰

中書制誥六

新體○凡四十八道



鎮州軍將王怡判官李序先被賊中誅囚並死
各贈官及優卹子孫制

敕朕嘗思鎮冀之間弔伐之際有仗順死義不吾聞者
因命弘正列狀以聞而某官王怡等頃陷艱虞思伸忠

効或名節將立併命於幽憂或義烈臨奮夫身於戮辱
履危如虎尾視死如鴻毛若無褒揚何勸天下既降節
終之命仍加身後之禮追崇延寵有越常倫冀使死節
之魂忠憤之骨知我憐憫歿無恨焉怡可贈左僕射序
可贈給事中

武寧軍陣亡大將軍李自明贈濠州刺史制

敕王師之討蔡平鄆也自明為武寧裨將隸於元戎凡
所指蹤必先致命三軍之士于今稱之有勞未圖無祿

早代生不及賞歿而加恩庶使猛將義夫聞而相勸曰
死而不忘況生者乎可贈濠州刺史

裴弘泰可太府少卿知左藏庫出納制

敕前度支河北榷鹽使朝議郎檢校尚書刑部郎中使
持節見州諸軍事兼權知貝州刺史侍御史充本州防
禦使上柱國賜紫金魚袋裴弘泰九土之貢百品之貨
辨其名物謹其出納常在外府統以上卿宜求幹敏之
才以為之貳而弘泰頃分榷務兼撫郡民當軍興之時

法行政立則受藏之府事繁物殷量其器能可以專委
勉膺是任無替前勞可守太府少卿知左藏庫出納散
官勲賜如故

李昌元可兼御史大夫制

敕通議大夫使持節儀州諸軍事儀州刺史兼御史中
丞上柱國李昌元弓裘令子疆場勞臣能讀父書甚識
戎事每在戰陣未嘗無功及委藩條亦聞有政而知臣
者君也賞勞者爵也亞相之秩威重寵崇加乎爾身以

勸能者可兼御史大夫

田穎可亳州刺史制

敕正議大夫前檢校右散騎常侍使持節洺州諸軍事
兼洺州刺史御史大夫充本州團練使上柱國賜紫金
魚袋田穎自別屯將壘專領郡城而能勤恤師人與之
勞逸故臨戎則士樂為用撫下而衆知嚮方忠勲既彰
能政亦著牧守之選吾所重之譙鄴之間人亦勞止授
爾印綬往勞來之宜推前心佇立後効可檢校右散騎

常侍使持節亳州諸軍事兼亳州刺史御史大夫本州
團練使鎮遏使散官勲賜如故

薛伯高等亡母追贈郡夫人制

敕某夫人某氏等始播婦儀終垂母道教其令子為我
良臣而皆茂著才名榮居爵位永言聖善宜及顯揚俾
追啓邑之封式表統家之訓可依前件

李佑授晉州刺史制

敕郡守之官與吾共理下之安否繫乎其人必稽前功

方降是命某官李佑夙負材器累經任用常領軍郡頗著政聲而平陽舊都近罷征鎮上疆事物既廣且殷藉爾良能為予撫字夫均其征役簡其科禁謹身省事以臨其人而人不安未之有也往弘是道以康晉人可依前件

武寧軍將王昌涉等授官制

敕王昌涉等早以材力召募從軍元和以來南征北伐咸有勞績著于一時主帥上聞乞加褒賞故以奇卿憲

職序而寵之無棄前功在申後効可依前件

馬摠亡祖母韋氏贈夫人制

敕某官馬摠亡祖母韋氏播茲懿範貽厥嘉謀施及孝
孫實居貴仕將明餘慶其在追榮不唯垂裕後昆抑亦
光昭幽壤宜降封丘之命以慰令伯之心可贈某夫人
路貫等授桂州判官制

敕藩隅之重委以侯伯軍府之要掌在賓寮貫等以文
行修身以智謀從事佐廉問澄清之務撫華夷錯雜之

人俾其久安實在叅贊宜及寵命以光所從可依前件
駙馬都尉鄭何除右衛將軍制

敕周設七萃漢列八屯皆以拱衛王宮肅嚴徽道統茲
駙吏其屬親賢其官鄭何擢秀士林挺質公器以貞和
陶其性以禮樂文其身善積德門慶連戚里況久踐名
職累著聲猷念舊獎能宜加榮寵環列之尹不易其人
俾宣力於爪牙不失親於肺腑可右衛將軍餘如故

封太和長公主制

敕公主之封號也或以善地或以嘉名立愛展親茲惟
舊典第四女端明成性和順稟教靜無違禮故組紉
切有常訓動必中節故環珮有常聲歲茂穠華日新淑
問乃眷肅雍之德俾開湯沐之封可封某公主

宋朝榮加常侍制

敕河東節度都押衙試太子賓客兼御史中丞宋朝榮
嘗因戰功擢領邊郡揆能適用故有轉遷龍樓上寮衙
門右職雖有兼命未表殊恩宜加騎省之榮不改憲臺

之重以茲寵任足報忠勲爾其敬承無隳乃力可檢校
左散騎常侍餘如故

贈陣亡軍將等刺史制

敕故某官某等王師問罪至於淄青爾等同執干戈親
當矢石忠而盡瘁勇而亡身或退卒於師或進歿於戰
俱死王事深惻朕心念捐軀於軍前宜追命於泉下郡
守之貴以示褒榮可依前件

諸道軍將等授官制

敕平齊之役也諸軍指期衆校合戰某官等各輸戮勇
同樹勲勤永思積日之勞頗愧踰時之賞故於獎授有
所超遷朝右貴班官坊清秩或叅憲職分以命之庶知
我心不忘忠力可依前件

裴度韓弘等各賜一子官并授姪女壻等制

敕某官某等謁廟郊天改元肆青是為大慶與衆共之
矧股肱心膂之臣與吾同體延賞任子其可廢乎爾等
或以文華或以吏職有所修立稟於義方自當褒升况

霑慶澤俾舉展親之典用叶推恩之道猶子愛壻各命以官爾其敬承無忝朝獎可依前件

入迴紇使下軍將官吏夏侯仕戡等四十人授卿監賓客諮議衛佐同制

敕某官夏侯仕戡等前命鄭權之入迴紇也爾等叅護使車用祇王命悉心盡力有恪恭跋滯之勤馬宜以省寺軍衛之班宮坊府邸之列舉為賓典分以寵之辨等旌勞於是乎在可依前件

盧昂可監察御史裏行知轉運永豐院制

時王
搢奏

請

敕虢州司戶叅軍盧昂前負瑕疵事多曖昧今聞修省
善亦昭彰況有大僚同知情狀且明非罪仍舉有才吾
信人言遂可其奏爾思自効無辱所知可依前件

張惟素亡祖紘贈戶部郎中制

敕右散騎常侍張惟素亡祖某縣令某德合上玄才終
下位命屈於當代慶流於後昆故其孝孫實登貴仕經

曰無念爾祖詩曰貽厥孫謀此言孫之謀能顯揚其先祖之德能垂裕於後也不追榮於列宿曷旌德於太丘可贈戶部郎中

興州刺史鄭公逵授王府長史李循授興州刺史同制

敕鄭公逵等或以行稱或以才舉進修所致班秩不卑改命序遷各適其用且乘朱輪於郡邸曳長裾於王門士子名宦至斯亦不為不遇也立朝案部各敬爾官可

依前件

權知陵州刺史李正卿正除刺史制

敕審材之要考察為先吾之於人試可乃用李正卿頗
闕吏道因假郡符畏法愛人善於其職夫速旌其能則
吏勸久於其政則化成未可轉遷就加真秩副吾知獎
無怠始終可陵州刺史

知渭橋院官蘇洎授員外郎依前職前進士王

績授校書郎江西巡官制

敕某官蘇利

良以切

嘗以幹良分領劇務受任稱職主者

上聞績既有成賞安可闕前進士王績亦以藝學籍名
太常著其令聞及此慰薦一以課進一以才升咸加班
榮同以褒獎臺官校職爾各欽承可依前件

湖南都押衙監察御史王瓘可柳州司馬依舊

職制

敕某官王瓘

取猥切

郡司馬之官秩祿頗厚凡在戎行有

軍課者多兼命以優寵焉而瓘以鞭弭橐

姑勞切

鞬

經天切

從事征鎮前後主帥咸稱有功宜加新命仍率舊職蓋欲旌往勞而責來効也爾其勉之可兼柳州司馬

安南告捷軍將黃士係授銀青光祿大夫試殿

中監制

敕某官黃士係

倉含切

戎首來降陪臣告捷服勤靡盬將

命無違宜以恩榮獎其勞効貴階崇秩兼而寵之可依前件

王鑑可刑部員外郎制

敕刑曹郎闕朕詔執事擇可以善於其職者而殿中侍御史王鎰自居殿中能察非法連鞫庶獄多協平允加以溫敏靜專可當是選一歲之獄決在秋冬今方其時宜敬乃職

京兆府司錄叅軍孫簡可檢校禮部員外郎荆南節度判官浙東判官試大理評事韓欽

七

切可殿中侍御史巡官試正字晁朴可試協

律郎充推官同制

敕某官孫簡等凡使府之制量職之輕重以命官揆時之遠近以進秩俾等衰有常序遷次有常程勞均而名分定矣簡自登憲司佐相幕府暨糾天府皆有可稱而欽等亦以文學發身謀畫効用荆揚浙右實籍賓寮況今之公卿大夫皆由此塗出慎爾職事爾無自輕可依前件

冀州奏事官田練可冀州司馬兼殿中侍御史

制

敕某官田練幹敏立身公勤濟事奉州將之手疏達軍人之血誠念其忠勞宜有寵擢假憲名於殿內遷郡秩於治中茲謂兼榮爾其敬受可依前件

薛常翹可邢州刺史本州團練使制

敕新授深州刺史薛常翹

呼對切

平蔡之役常領偏師實

立勲勞遂膺寵任今屬方隅多故將守用能且以翹之長材居邢之要地故命魚符換郡熊軾移轅夫事至而功成時來而節見此忠良之事業也爾其念之哉可依

前件

牛元翼可檢校左散騎常侍深州刺史御史大

夫制

敕某官兼御史中丞權知深州事牛元翼命官之要凡
試吏者必俟成效然後即真而元翼有理戎之才扞城
之畧權領軍郡能修武經士樂人安厥有成績是用假
威臺憲真拜郡符仍以金貂示其兼寵吾聞忠臣立節
烈士垂名其要無他得時而已勉竭才力副予斯言可

依前件

王衆仲可衡州刺史制

敕前虔州刺史王衆仲聚學修身由文飾吏累經任使
頗著良能前牧南康亦聞有政宜新印綬載領藩條而
衡湘之間蠻越雜處無以俗陋不慎乃事無以地遠而
怠厥心副吾陟明俟汝奏課可依前件

田盛可金吾將軍勾當左衛事制

敕右金吾衛將軍田盛夫仕官至執金吾古今所榮重

也而盛生勲德門有文武畧居貴介而無佚領誰何而有勞言念徼巡之功宜及轉遷之命處左攝事以表使能可依前件

陳楚男王府諮議叅軍君賞可定州長史兼御
史軍中驅使制

敕某官陳君賞夙承義訓幼有令聞專繼弓裘之名通
知軍旅之事因仍憲職兼佐郡符敬服寵章勉從任使
崔承寵可集州刺史制

敕太子左諭德崔承寵早登班級亟換星霜自陳力於
貴朝屢奉辭於外國職因事博績以勞成就列宮坊既
申贊諭之美分符郡邸佇聞刺舉之能宜勵公心祇承
寵命

前貝州刺史崔鴻可重授貝州刺史制

敕前貝州刺史崔鴻嘗牧貝丘能修其職及辭印綬頗
闕去思相時之宜從人之望俾換新命再臨舊邦况聞
貯蓄時材諳詳物務而方州思理侯伯薦能勉勤為政

之心勿忝知人之舉

前吉州刺史李繁可依前吉州刺史制

敕前吉州刺史李繁累奉藩條皆奏課第故移縉雲之政俾牧廬陵之人雖降璽書未臨郡邸屬魚章改造熊軾追還事既謀新職宜仍舊勉率分憂之任庶成來暮之謠

瀛漢州都虞候萬重皓可坊州司馬制

敕某官萬重皓嘗資武力早備戎行頗歷艱虞亦聞勤

効而洛隅未靖遷轉從宜言念前勞宜加優秩可坊州
司馬

崔墉可河南府法曹叅軍制

敕鄆曹觀察判官監察御史裏行崔墉文行飾躬公清
奉職士林推美藩府薦能軍旅之間久資其用忠勤之
後不殞其名宜拔才於功臣俾試吏於府掾可依前件

前河陽節度使魏義通授右龍武軍統軍前泗
州刺史李進賢授右驍衛將軍並檢校常侍

兼御史大夫制

敕文武之才内外迭用軍國之任出入遞遷斯所以優
勲賢而均勞逸也某官魏義通以戎功積久榮委旌旄
某官李進賢以軍課居多寵分符竹各勤其職咸用所
長是以河陽三城鎮靜而不擾泗濱一郡緝理而有勞
我有禁軍爾宜分領親信則倚為心膂動用則張為爪
牙苟非其人不付此任咸假貂蟬之貴仍兼憲職之榮
勉哉二臣無替一志可依前件

李玄成等授官制

敕黔州觀察使兼度支使李玄成等或蘊蓄能才咨謀
是藉或分領劇務課績有成並可奏書各遷憲職勉勤
乃事無忝所知各依前件

馬摠準制追贈亡父請迴贈亡祖制

敕夫積善者慶鍾於後顯揚者光昭於前而摠貴為邦
君賢為國士荷貽謀之訓用率義之文上獻表章有所
陳乞朕念其祖德褒以臺郎所以復陳寔必興之言慰

范喬泣涕之思庶使幽顯兩無恨焉可贈某官

權知朔州刺史樂璘正授兼御史中丞制

敕樂璘專習武經旁通吏道試補郡守以觀其能連帥
上聞果副所舉夫審官之要在因其所長而任之則政
速成而化易就也才既試可官宜即真何以寵之就加
憲職可朔州刺史兼御史中丞

神策軍推官田疇加官制

敕田疇官列環衛職叅禁軍慎檢有聞恭勤無怠顧是

勞効例當轉遷郡佐官寮以示兼寵

裴敞授昭義軍判官裴侔授義成軍判官各轉

官制

敕裴敞等昭義義成今之重鎮實藉賓介以參謀猷而
二帥皆勤於奉公精於辟士度才而授職循序而請官
頗合所宜咸可其奏可依前件

雲州刺史高榮朝除太子賓客河東都押衙制
敕高榮朝常領銳師入攻堅寇因累獎賞位至專城才

有所長宜遷我職功不可忘
魚進榮班勉事元戎無替
勞効

韋綬等賜爵制

敕韋綬等去年春夏同奉寢園事集禮成副吾哀敬宜
加封爵以報恪勤可依前件

烏重明等贈官制

敕故某官烏重明等夫生樹功勤歿加褒飾有國之常
典也重明等在興元初常執勤於奉天策勲為定難無

祿卽代有勞未圖星歲屢遷光塵不昧聞鞞蒲縻切之念

予心曷忘俾慰幽泉各追顯秩可依前件

羽林龍武等軍將士各加改轉制

敕夫軍衛警則內外嚴爵賞明則忠勤勸爾等咸以材
力列于禁營屬去年以來屢陳儀仗雖加賜與未答勤
勞因詔有司舉行賞典吾匪虛授爾宜敬承文武班資
各從序進可依前件

新羅賀正使金良忠授官歸國制

勅新羅使倉部郎中金良忠等朕以文明御時以仁信
柔遠聲教所及駿奔而來况溟漲一隅舟航萬里爾慕
我化我圖爾勞隨其等倫命以寵秩無替前効永為外
臣可依前件

白氏長慶集卷五十三